


# NZAMBÌ UDI

## MUBANJI MU LUSE

 Nudi mwà kusòmbelaayi panshi. Mvwa...anyi bingambùle, pângààfiki ne kumòna Mwanèètù Moore ne bakwàbò bwònsò pa cibùmbà cyà ku cyambilu apa, balundà bândi mumanyàngàne naabò kùkaadi bidimu bipite búngi. Ncyà bushùwà eci's ndyèsè dyà kubàmòna kaaba aka dilòòlò edi. Ndi ndyùmvwà bu mukesè mene bwà kwimana kaaba aka ne kwakula ne beena tèdòlòjì bu nùнку basòmbe paanyimà pàànyi apa, ne pàmwàpa nebàndongòlòle pàndi mutùpàkàne. Ndi ntèkemena nàнку.

<sup>2</sup> Tudi ne disànkà dyàbúngi dilòòlò edi bwà kwikala ne muntu kampànda kaaba aka, Mwanèètù wa bakàjì Rose. Tuvwa twenda tupweka. . .Mvwa ne Mwanèètù wa balùme Shores ne mumukwàcishi wendè mu mudimu, leelù ewu, bwà didyà dikesè dyà mundaamunya. Ne mu njila twenda tupweka, Mwanèètù Williams kwambaye ne Mwanèètù wa bakàjì Rose ùvwa ùsaama bikolè. Ke twètù kubwela bwà kumwela dísù ànu bwà katanci kakesè cyanààna, twètù kutwà binù. Kàdi ùvwa ne mubidi kapyà bu mbàbùlà, ne ùsaama ànu byètù byà menemene ebi. Ànu myàkù mikesè yà disambila, ke Mukalenge kwakula neetù, ne kwamba ne: “Neikalè ne cyà kwondopiibwa.” Yèyè ne: “Neikalè kuntwaku mààlabà dilòòlò,” mùdìbo bàmba. Kàdi's ki yèyè ewu dilòòlò edi, musòmbe kaaba aka mene. Ncyà bushùwà.

<sup>3</sup> Mwanèètù wa bakàjì Rose, juukila kuulu ànu bwà katanci, bwà bôbò. . .Tudi ne kusàkidila kùdi Mukalenge. Ùvwa bìbìdi ne bulààlu's. Kwambaye ne: “Dya—dyabùlù kàdi's ke kumpangishayè mu byònsò. Ndi mulwe too ne mwab'ewu kàdi kukwàcika kùdi disaamà edi,” disaamà kampànda dyà pa muminu, ne bikwàbò. Kàdi Mukalenge mmumupàtùlemù, pa nàнку tudi ne disànkà bwà bwalu abu. Tusàkidila Mukalenge wetù munanga!

<sup>4</sup> Mpindyewu tudi bapicìle mu bikondo byà dicyònkómoka. Nèнку mààlabà dilòòlò, mpindyewu, tudi tuya lwà ku—ku Ramada kwàka. Kàdi kanùpù mwoyi mpindyewu to ne, kabyàkwikala mwab'ewu maalabà dilòòlò to, nebìikale ku Ramada. Nèнку mpungilu ùdi ùtwàdija dilòòlò dyàlondà. Nebikengele bwà nuntwàla dilòòlò dikwàbò kàbìdi, nudi bamanyè's.

<sup>5</sup> Nàнку dilòòlò dishààle edi mvwa—mvwa mulalùke mupicìshe dìbà, mvwà mudyènzeku mulayi mukesè ne, dyà mpàtùkìlà dyà cidimu, bwà ne nèngìikale ànu mwà kwipidija

Mayiisha awu kuwùmusha ku mēbà àsàtù anyi ànaayi, àtaanu, bwà pāmwapā kuya naawù ne ku tusunsa makumi àsàtù anyi ànaayi. Nènku ànu mûmvwà munwambile makèèlèlè dilòòlò amu, mukàjàànyì ùvwa mungambe mu dyàlumingu, wamba ne: “Uvwa mwenzè bîmpè menemene’s.” Nànku—nànku dîbà adi, mu bushùwà bwà bwalu, kukèngelabi bwà mēmè kulwa kubinyakaja makèèlèlè dilòòlò awu, nwamònu’s. Kàdi mvwa muye ku tusunsa makumi àtaanu ne tûtaanu, pamutù pàa tusunsa makumi àsàtù, makèèlèlè awu dilòòlò.

<sup>6</sup> Pāmvwà ngènda mpweka, dilòòlò, Billy kwambayè ne: “Mpa cinyi pawikalà mwà kwakula?”

<sup>7</sup> Mēmè ne: “Èè, ndi ne tuntu tukesè tufùnda mwaba ewu, ne yimwè Mifùndu. Ncyènà mumanyè to, yimwè yà ku yôyi, Mayiisha ànaayi anyi àtaanu mashiilàngàne.” Mēmè kwamba ne: “Ndi ngùmvwa ne pangààfika kuntwaku, nènku nēmmòne cìdì munkaci mwà kwenzeka.”

<sup>8</sup> Yèyè ne: “S’uvwa mulayè bwà kusambidila babèèdì bwònsò abu.”

Mēmè ne: “Èyowà’s, mukalenge. Mbùngì kaayi bwà twartà bunùdì naabù?”

Yèyè ne: “Nkàmà yìbidì.”

Mēmè ne: “Mbitàmbe bwîmpè mbange naatù, dilòòlò edi’s.”

<sup>9</sup> Ki yèyè ne: “Mpindyewu wàvùluka ne, udi ànu ne tusunsa tutwè ku dikumi ne tûtaanu bwà kwakula.” Yèyè ne: “S’uvwa mwangate tukwàbò atu makèèlèlè dilòòlò.” Nebikèngele bwà twètù kulwijakaja, kí mmwòmò anyi?

<sup>10</sup> Èè, tuvwa banwenzèle mulayi, wà ne netùsambidilè bantu bàvwà ne twartà twà masambila abu, ne twètù tudi—tudi baswikùbwe ku mulayi, mu bushùwà bwà bwalu. Katwèna mwà kubàpicisha bwònsò mu milongo eyi to, anyi ncyàkukùmbana bwà kubàbìikila ku muntu ku muntu, lwà mu batèeleji mwàmwa to. Nànsha byòbi ne Nyumà Mwîmpè mmufwànyine kucìmpèèsha, ncyènà—ncyènà ànu mwà kutwàla bwà kucyenza to. Mbìmpicìle bikolè. Nènku, kàdi tudi bwònsò bamanyè bintu abi. Tudi bamanyè ne Nzambì ùcìdì ànu Nzambì. Kì ng’aci cìdì cyòndopa to. Aci’s kì cìdì ànu cìbaka diitabuujà, bwà kutùfikisha ku dimanya ne—ne tudi mu Bwikadi Bwèndè.

<sup>11</sup> Nènku, dilòòlò edi, netwikalè bwà kusambidila babèèdì bwònsò abu, muntu ne muntu wa ku aba bàdì ne twartà twà disambila abu, bwà kumusambidila. Ne pashiishe mààlabà dilòòlò, lwà ku Ramada kwàka, netùteetè bwà kwabanya tukwàbò ndambù ne kutwàdija kubàsambidila kuntwaku, bwalu kucìdì ànu kunshàadile mààlabà dilòòlò awu. Nènku ndi ngèèla meeji ne ndi ne dilòòlò òmwpèlè bwà mpungilu awu, pāmwapā ne didyà dyà dindà kampànda kàbidì. Mbilàadile ku mùshindù ùlwalwà bintu.

12 Kùdi bàmwè, umwe wa ku baakudi uvwa kàyi mufika to; kí mmwanji kudileeya to, ke mündi mmòna's. Mwanèètù Humburg, anyi kùdi. . . [Mwanèètù wa balùme kampànda ùdi wàmba ne: "Amburgy."—Muf.] Amburgy, Amburgy, Kash Amburgy. Nàнку ndi—ndi muditèèle bibi menemene, aci's ndîna dyà cyena Allemagne. Ngèèla—ngèèla meeji ne ndyà cyena Allemagne. Nàнку awu ndi mwà kwikala ne cyà kukwàta mwaba, mutùtù tucibiikila, fwàyiku luse bwà cyakwidi aci, bwèndè yèyè.

13 Pa nàнку tudi tupicila mu cikondo cilenga cyà dikèma mu Mukalenge, nànsha nàнку. Bwènu nwènu bwònsò, kwòkò kwikale beenyi mwaba ewu dilòlò edi, ncyà bushùwà ne tudi ne disànkà dyà kwikala neenu mwab'ewu, ne batwishiiibwe ne Mukalenge neànübènèshè. Ndi ndòmba bwà kakwikadi mubèèdi nànsha umwe mu nzùbu emu patùumuka dilòlò edi to, bwà Mukalenge wetù àpwekèku mu bukole Bwèndè bunène òndopèku ewu yònsò udi usaama ne mu lutàtù.

14 Kùkaadi cikondo, mvwa ne ciibidilu cyà kwangata bantu-nkààya mu miyiiki yà bàbidi yà pabwàyi, àmwè à ku maalu makolè atùvwà katùyi mwà kujikija to. Pashiishe kuvulabi ne lukàsà lukolè, too ne mwàvubi ku, Mukalenge ùvwa ànu mutungùnùke ne kubibènèsha, too ne mutwàvu kwikala ne nkàmà yisàtù anyi yinaayi mindile, nàнку dîbà adi bantu bàdi bàdyumvwa batàcishiiibwe ku mwoyi bwalu bàvwa mwà kwindila. Pàmwàpa, mu diinè dîbà dyònsò adi, uvwa mufwànyine kwindila pàmwàpa cidimu cimwè anyi bibidi, bwà kubwelamù, nwamònu's, ànu pankacinkaci pàà masangisha apu, bwà kubàbweja mu miyiiki yà bàbidi. Nènku tuvwa ànu mwà kusòmba ne kwindila Mukalenge too ne mùvwàYe ùtwàmbila ànu bwalu abu menemene.

15 Kakùyì mpatà to ne kùdi bantu basòmbe mwaba ewu dilòlò edi bàvwà mu miyiiki yà bàbidi yà pabwàyi ayi. Bàdipù anyi? Elààyibi byanza byènu muulu tumòne. Mu miyiiki yà bàbidi yà pabwàyi. Èyowà, mbwòbù abu basòmbe, nàнку, kàdi's tudi bamanyè ne mbulelèlè. Tudi ànu twindila bwà kumòna cidi Mukalenge mufwànyine kwamba, cidi bwalu abu. . . Nènku pashiishe byàkakèngela bwà mémè kwimakija aci kùkaadi cikondo kampànda. Mémè kwambila Billy ne katùvwa kàbidi mwà kwenza miyiiki yà bàbidi yà pànkààya nànsha.

16 Nwamònu's, ndi—ndi—ndi mfuma ku dipicisha bidimu makumi àbidi ne bitaanu, matùkù mashààle aa, bwà musangu mwibidi, nènku ngènda nya mutàngile ku musangu mwisàtù. Nàнку awu paùdi wenda ukùlumpa ndambù, mòna's, kwèna, wèwè. . . mu mùshindù kampànda kwèna mwà kutungunuka mùvwà ne ciibidilu cyà kwenza amu to. Bidya byèbè bidi byènda biipidika. Nènku—nènku, mu bushùwà bwà bwalu, Mwanèètù Moore kí mmwanji kumanya cintu nànsha cimwè pa bwalu abu to. Yèyè. . . Ngèèla meeji ne tudi bu beena mulongu.

17 Kàdi bidimu bikaadi bifwè bilàkuke kacya wèwè ne mèmè, ne Mwanèètù Brown twâlwa mwab'ewu musangu wà kumpàla, ne Mwanèètù Outlaw ne Mwanèètù Garcia, ne Mwanèètù Fuller. Ndi ndikonka bantu abu ní mbafwànyine kwikala mwab'ewu dilòlò edi? Mwanèètù Garcia, Mwanèètù Fuller, Mwanèètù Outlaw, bàdi kaaba aka anyi? Elàayi byanza kuulu panwikalàpu. Èyowà, ki Mwanèètù Fuller wàwa, ngèèla meeji, mèmè nciyi mutùpàkàne to. Mwanèètù Outlaw ùdi lwà mwab'ewu. Mwanèètù Garcia, kàdi ndi—ndi ngèèla meeji ne yèyè mmuumùke ku Phoenix. Ngèèla meeji ne ncyà bushùwà. Yèyè—yèyè mmuumùke ku Phoenix, ne ùdi lwà mu Californie mwàmwa. Èè, àvwa bushùwà matùkù à butùmbi, nciði ànu ngiitabuujja Mukenji ùmwèumwè ùmvwà naawu dîbà adi awu ne: “Yesù Kilistò umweumwe awu makèèlèlè, leelù, too ne kashidi.” Ngèèla meeji ne kùkaadi bu...Èè, Becky ùcivwa mwànà mukesè. Aci's nkùkaadi bidimu biipacila ku dikumi ne citèèma.

18 Kàdi mpindyewu's nnsongàakàjì munène, mukulumpe, wa katankù, cibi cyàbò wa nkòtootò musòmbe mu batèeleji amu mwaba kampànda, wa bidimu dikumi ne citèèma. Becky, udi kwèpi? Balùmyànà wa yààyà, s'neàmònangane naanyi bwà bwalu abu. Ndi mvùluka mùmvwà mumwambule mu dibòku. Ncyà bushùwà ne civwa mwà kwikala mudimu wà pa wòwò bwa kwenza nàнку dilòlò adi.

19 Ndi mvùluka lwà ku èkèleeziyà wa Mwanèètù Garcia dilòlò adi, ùvwa mwànà mukesè menemene. Ki mèmè kwamba ne: “Tudi ne disangisha dyà buloba bujimà dilòlò edi.” Mèmè ne: “Ndi ngàakula ne beena ci-Espagnol.” Nèku mèmè kwamba ne: “Mukàjàanyi ewu's mmwena Allemagne.” Mèmè ne: “Mèmè ndi mwena Irlande.” Ki mèmè kwamba ne: “Nèku mwànàanyi wa bakàjì mukesè mmwena Inde,” ne mwine awu ùvwa m'Becky.

20 Pa nàнку pàngàakapàtukilà ku ciibi cyà paanyimà aci, kùvwa mwànà mukesè wa bakàjì wa beena Mexique kuntwaku, wàmba ne: “Mwanèètù Branham!”

Mèmè ne: “Èyowà, munanga wanyi, udi muswè nciyi?”

Mèmè ne: “Kwèna wela meeji ne mwanèèbè wa mu dibòko mmutàmbe kutòkòlòka ndambù, bwà kwikala mwena Inde anyi?” Yèyè's ngwa nsuki yà mvwàngalà, udi mumanyè's.

Ki mèmè ne: “Ànu mwena Inde wetù ewu mu cyenzi.”

21 Èè, tudi ne kusàkidila, bwà, kwikala cyàkàbidì apa dilòlò edi. Mpindyewu kumpàlà kwà twètù kuseemena ku Dìyi, tuseemenaayi kùdiYe, bwalu Yèyè ke Dìyi. Pàdi Dìyi dimwènèshìibwe, awu's n'Yèyè munda mwèbè.

22 Ànu mutùvwa buumvwè makèèlèlè dilòlò awu pa *Dimiinu Dyà Dipanganangana*, nuvwa basànke naaci anyi, ne dibènesha dyà Mukalenge adi? Mvwa—mvwa bulelèlè musànke

bwà kunùtwàdila Dyiisha adi. Nènku tudi tumòna cidi mamiinu awu.

<sup>23</sup> Mpindyewu kùdi dilòmba dyà pabwàdì dilòòlò edi, ànu cintu kampàndà cyà pabwàcì anyi? Pàmwápa bàmwè bàà ku nwènù bwònsò bààpicilà mu mulongo wà babèèdi ewu, nwambe ne: “Nzambì, ikàlàku naanyì luse. Pàndì ndwa bwà kunsambidilabù, enzàku ne diitabuuja dyànyì dibandè difike pa cipidì cidi cikèngela.” Nènku—nènku pàmwápa muntu kampànda ùdi ne munanga wendè, ùsaama, ne cintu kampànda. Udikù ànu mwà kwela cyanza cyèbè muulu bwà Nzambì wàmòna ànu mwà kupwekesha mèsù ne kwamba . . . Mpindyewu byòbì ne . . . Kanwèna bamanyè mündi ndyùmwa pàndì ntàngila kuntwaku to. Tàngilàayi ànu majinga muntwemu’s! Bambi naanyì, tàngilàayi ànu aci. Nwamònu anyi? Mpindyewu, cyòcì cyènza ne ndyumvwè mùshindù awu, cidi cyènzela Taatù wetù ncinyi? Cyà bushùwà.

Mpindyewu túsambilàayi.

<sup>24</sup> Yesù munanga, nyèwù tusemena mpindyewu ku Nkwasa wa butùmbì munèna wa luse, mu Dìna dikùmbànyine byònsò edi. “Bwalu kakwèna Dìna dikwàbò difidiibwe munkacì mwà bantu kutùdi ne cyà kusùngidiibwa to, kàdi ànu Dìna dyà Mukalenge Yesù.” Ne tudi tulwa mu Dìna Dyèndè. Nènku tudi tulòmba, Taatù wa mu Dyulu, bwà Wèwè kutwàkidila, dilòòlò edi, bu bàna Bèèbè bàdi biitabuuja. Ne fwàku bupidyà bwètù luse, Mukalenge. Enzàku dilòòlò edi, bwà biikalèku ne tumòne mwà kwitabuuja mu kaabujimà Dyi dyà Nzambì dyònsò dilòòlò edi, bwà bintu byònsò bitùdi naabi dijinga abi.

<sup>25</sup> Udi mumanye cidi mwinshì mwà byanza bìdi byela muulu ebi; kùdi mabèèdi, bàmwè bàà ku bwòbò bàdi mwà kwikala ne ntàtu kampànda yà kumbèlù, bàmwè bàà ku bwòbò ne ntàtu yà mfranga, bàmwè bàà ku bòbò mbazengèle, pàmwápa bàmwè mbatwè cimpingà, bàmwè bangènzàmpèkàatù. Cyònsò cidi dijinga aci, Wèwè udi mutàmbe kukùmbanyina bwà kukùngamangana ne dìnà mulwishì yònsò. Pa nàнку tudi tulòmba, Mukalenge, bwà—bwà dilòòlò edi, bwà twàmòna mwà kujingulula ne balwishi bèètù, umwe ne umwe, mbacimùnyìbwe, nànsha lufù lwinè. Ne bwà ne tudi batàmbe ne bacimunyi mu Yèyè Wa—Wakatùnanga ne kuDìfila bwètù, mutùsukùle mu Mashi Èndè.

<sup>26</sup> Tudi tulòmba, Mukalenge, bwà ne bupidyà bwònsò, mpatà yònsò, dibungama dyònsò, byònsò bìdi kabiyì bifwànàngàne ne Nzambì abi, bitùnyeemè dilòòlò edi, bwà ne Nyumà Mwimpè wàmòna mwà kukòokèsha mu myoyi yetù. Swàkù bwà Yèyè kutwàkwilakù mu mìshindù yà kayiyì yumvwika to. Swàku bwà àtwakwile mu Bukolè Bwèndè. Swàkù bwà Yèyè kubiishaku aba bàdi—bàdi bafwè mu nyumà, kwaluja bukolè bwà mubidi kùdi aba bàdi bàsaama ne babungàme, kukolessa binù bitekete,

byanza bizengèle bidì kacya ànu byàlembelela. Nènku swâkù bwà kwikalèku cikondo cyà dicyònkomoka.

<sup>27</sup> Cibwayikèku dilòòlò edi, Mukalenge, bwà kushiya kaaba aka kuya ku Ramada Inn, ne kukùtula umwe wa ku mpungilu mitàmba bunène yà kacya bènza mpungilu mu cimenga eci. Mukalenge, patùdi badìsangishe ne tusambila apa! Wèwè wâkamba ne: “Piikalà bantu bàdì babilikidiibwe ku Dîna Dyanyi, mwà kudìsangisha pàmwè ne kusambila, dîbà adi Mémè nèmbatèèlèjile mu Dyulu.” Nzambi, tudi tulòmba bwà eci ciikalèku nànkù, dilòòlò edi.

<sup>28</sup> Mpindyewu, Taatù, patùdi tubala Díyì apa, muntu nànsha umwe kèna mwà kuDyùmvwija to ànu Wèwè, Wèwè udi Mumvwiji wa Wèwè mwine, nènku tudi tulòmba bwà Wèwè kutuumvwijakù bintu bitùdi tubala dilòòlò edi ebi. Bwalu tudi tulòmba nùnkù mu Dîna dyà Yesù. Amen.

<sup>29</sup> Mpindyewu piikalàbi ne, bààbùngì bàà ku nwènù mbaswè ànu kufùnda Mifùndu yidì mwambi ubala. Nènku ndi muswe bwà nwènù, dilòòlò edi, bu nwènù mwà kuswa, bwà kubuulula mu Efèsò.

<sup>30</sup> Nènku mvwa ngàakula mu dyàlumingu dishààle pa Efèsò, mùshindù ùvwà Mukàndà wà Yoshùwà mwikàle Efèsò wa Dipungila Dikùlukulu, ne mùshindù ùvwawù Mukàndà wà bupikudi.

<sup>31</sup> Nènku bupikudi bùdi ne bitùpà bibidì bishiilàngàne: “kupàtuka pambèlù pà” ne “kubwela mu.” Dyàmbedi, bikèngela ùpàtuke pambèlù. Bàmwè bantu mbàswe kubwela ne maalu à pa buloba mambula; kàdi bikèngela ùpàtuke ne maalu à pa buloba, bwà kubwela mu Kilistò. Bikèngela ùpatukè mu bupidyà, bwà kubwela mu diitabuuja. Kakwèna mwà kwikala cintu nànsha cimwè mu njila wèbè to. Bwà kwikala ne diitabuuja dishùwashùwàlè, kakùyì mpatà to wèwè udi ne cyà kushiya byònsò bidì bibèngangana ne Díyì dyà Nzambi, paanyimà, bwà kubwela mu diitabuuja.

<sup>32</sup> Ne aci civwa m’Mukàndà wà Efèsò wà Dipungila Dikùlukulu, Yoshùwà. Mwaba ùvwà, Mòsà ùleeja mpàla wa mikenji, kàyì mwà kusungila muntu nànsha umwe to; kàdi ngàsà ùvwà mwà kusungila, nènku apa *Yoshùwà* ùdi mmwàkù ùmwèùmwe bu mùdi Yesù ne: “Yèhowàh–musungidi.”

<sup>33</sup> Nènku mpindyewu pashiishe, tudi tusangana ne tudi bakafikè ku Efèsò mukwàbò, Efèsò mukwàbò mpindyewu. Mwaba awu, ne, mu mângumba ètù à mamanya à mu mitù ne bikwàbò, ne ndongamu yètù yònsò yà tulaasà yáfiki ku wayi–wayi Yadenà, dîbà adi tudi ne cyà kwikala cyàkàbìdi ne mungà–mungà Efèsò. Tudi ne cyà kwikala ne cimwangì, bwà “kupatika” ne bwà “kubwela mu,” bwà Dyambwibwa.

<sup>34</sup> Mpindyewu netùbalè dilòòlò edi kuumukila ku nshapità mwi2 wa Efèsò. Mvwa ànu munkaci mwà kwamba nànkù bwà

nwàmòna mwà kufika ku—ku bwalu mene, anyi kubuulula nshapità awu.

*Nwênù, ne nwênù mmunufuùlùlùlùle, nwênù bàvwà bafwè mu matomboka ne mpèkaatù:*

*Mu yòyì mu bikondo byà kale mmunùvwà nwênù nwendela bilondèshìle nkwaka wa buloba ebu, bikondo byà kale, bilondèshìle mfùmù wa bukolè bwà mu lupeepèlè, nyumà udi mpindyewu ùkwàta mudimi mu bânà bàà bupidyà:*

*Munkaci mwàbò mmutùvwà twètù bwònsò twenzela nsòmbelu mu bikondo byà kale mu nkùkà yà mubidi, tukùmbaja dijinga dyà mubidi ne dyà meeji; ne turwa ku ngiikàdìlù bânà bàà ciiji cikolè, ànu mene bu bakwàbò abu.*

*Kàdi Nzambì, udi mubanji mu luse, bwà dinanga dyèndè dinène dyàkatùnanngaye naadi,*

*Nànsha mene pàtwàkadì bafwe mu mpèkaatù, Yèyè wàkatùfuùlululula pàmwè Nendè, anyì, mutùfuùlululula pàmwè ne Kilistò, (ku ngàsà nkunùdi basungidùbwe;)*

<sup>35</sup> Ndi muswè kwangacila mwaba awu ndambù, anyi citùpà cyà mvensà cyà ne: “kàdi Nzambì,” *Nzambì Udi Mubanji Mu Luse*.

<sup>36</sup> Ndi muswè bwà nwênù kumòna mwab’ewu bwà ne mupròfetà, anyì, mupostòlò’s wè, Pòlò, udi—udi, mùshindù wàkatèèlaye bwalu ebu, mùshindù wa ne: “Nwênù bàdiYe mufuùlùlùlùle, bàvwà kale wàwa bafwè. Nwênù bàdiYe mufuùlùlùlùle, bàvwà kale wàwa bafwè, bafwè mu mpèkaatù ne matomboka; nwenda bilondèshìle maalu à pa buloba, dijinga dyà mubidi, ne dikumbaja dyà dijinga dyà meeji. Ùdi ne . . .”

<sup>37</sup> Ncinyi cyàkenzeja dishintuluka edi, nudi numòna’s? Nènku cyàkacifikisha ku ne: “kuumukila musangu kampànda unùvwà bafwè,” ku difuùluludiibwa ncinyi? *Mufuùlululula* mbwena kwamba ne “muvwijibwe ne mwoyi.” Kùvwa dishintuluka, kuumuka ku lufù kuya ku Mwoyi. Kakwèna cikwàbò, kakwèna cikwàbò cintu nànsha cidi cifwànyine kwenzekela muntu kanà yònsò, citàmbe bunène, bu kumushintuluka kumuumusha ku lufù kumutùma ku Mwoyi. Muntu, bu ne úvwa ùpunga ne lufù, mu mubidi, ne mufwànyine kwondopiibwa mu mubidi, aci ncifwànyine kwikala cintu cinène, kàdi kakwèna cintu cunène bu cyà pàdiye mufwè mu nyumà ne Nzambì mumufuùlùlùlùle ku Mwoyi to.

<sup>38</sup> “Nwênù bàvwà kale wàwa, mu bikondo byà kale, bafwè.” Nwakadi bafwè. Nànsha bààbùngì kaaba aka dilòòlò edi, musangu kampànda, bàdi mwà kutàngila paanyimà ne kumanya ne wèwè uvwa mufwè. Kàdi mpindyewu mbwà cinyi kanwèna bafwè dilòòlò, ànu munùvwà kale amu? Uvwa ne cyà kwikala mùshindù awu, bwalu uvwa ngènzàmpèkaatù, “kàdi Nzambì

Udi mubanji mu luse.” Aci’s ki—aci’s ki cintu aci ne: “Nzambì Uvwa mubanji.” Bintu byònsò bitùvwà twètù abi, “kàdi Nzambì”! Aci’s ke cìdì cìshintulula mwaba awu mene ne: “Nzambì Udi mubanji mu luse”!

<sup>39</sup> Kaa, ndi ne disànkà dyàbùngì bwà bwalu abu, bwà ne Yèyè ùdi mubanji mu luse. Bu byòbì ne Ùvwa ànu mubanji mu mfrangà, bu Yèyè ànu mubanji mu bintu byà ku byanza, ne ki mùdiYe mene, kàdi nànsha nànkù cintu citàmbe bunène ku byònsò nkwikala mubanji mu luse. Kaa, mmwàkù bunène kaayi’s, mùshindù utùvwà kale wàwa bafwè.

<sup>40</sup> Nènku tuvwa twakula dilòlò adi pa mùvwà dimiinu ne cyà kufwà. Ne bintu byònsò bìdì binyùngùlùkè mùtòlòkò wà mwoyi awu kabiyi ànu ne cyà kufwà cyanàànà to kàdi kubola. Byòbì kabiyi bibole to, kabyèna mwà kwikala ne mwoyi to. Nènku *kubola* mmùmwè ne: “bwàcì bujike menemene; nkujike.” Nènku twètù bafike mu cipimu cyà mmwènenù yètù twètù ne ngeelèlù wetù twètù wà meeji mmufwe menemene ne mubole mupàtuke mu twètù, dībà adi mùtòlòkù wà mwoyi ùdi mwà kubanga kwikala ne mwoyi.

<sup>41</sup> Mpindyewu—mpindyewu tudi bafwànyine, ndi mufwànyine kucimpikamù ànu ndambù mukèsè wà dilongesha kaaba aka, dīndī nciyi. . . Wèwè kùyi mucitàbùùje to, mbìmpè. Abi bìdi ànu bìmpè. Mémè ndi ncìtabuuja bulelèlè. Ndi ngìtabuuja ne—ne muntu, pàdiye ùlediibwa pa buloba ebu, bwà ne paùdì mwànà mukèsè wà mu dibòkò, mulediibwe pa buloba, wèwè kùvwà mufwànyine kwikala kaaba aka kabiyi ku didyànjlakumanya dyà Nzambì to, bwalu Yèyè kèna ne mikàlu to ne Yèyè mmumanyè bintu byònsò. Nènku pàdì mwànà mukèsè awu ùlediibwa pa buloba, kùdi cintu kampànda mu mwànà awu. Yèyè ne cyà kwikala ne Mwoyi, kùdi cintu kammpànda cikesè munda amu, mu mwànà awu dībà adi, kwàfikilaye, nànsha ku tootooto anyi ku ndandanda. Dimiinu dikesè adi dīdī mu yèyè amu. Mpindyewu bu nwènù mwà kwangata. . . Mifundù yidi yileea cyòci aci patòðkè’s.

<sup>42</sup> Mpindyewu wèwè mwikàle ne Mwoyi wà Cyendèlèlè dilòlò edi, twètù ne Mwoyi wà Cyendèlèlè, dībà adi tuvwa misangu yònsò ànu naawù, bwalu kùdi mùshindù ànu wùmwèpelè wà Mwoyi wà Cyendèlèlè. Tuvwa nànkù misangu yònsò. Nènku cìdì cyenza ne tuvwaku, mbwalu tudi citùpà cyà Nzambì. Ne Nzambì ki cintu cimwèpelè cìdì cyà Cyendèlèlè.

<sup>43</sup> Nènku ànu mwàkaakidilà Melekisedekè byàdikumi kùdi Abraham, ne bàakacìbadila mwikùlwèndè, Lewi, ucicìvwa mu cìfùka cyà Abraham; kufutayè byàdikumi, bwalu ùcicìvwa mu cìfùkà cyà Abraham pààkatwilanganaye ne Melekisedekè. Ndi muswè kwakula pa cyòci aci mu mwaba mukwàbò, dīndā kampànda. *Melekisedekè Ewu Nganyi?* Mpindyewu mōnaayi aci.



Kale wàwa, Nzambì ùvwa mumanyè ne mwànà wa balùme ewu ùvwa ùlwa. Ùvwa mumanyè bintu byònsò.

44 Mpindyewu tudi citùpà cyà Nzambì. Wèwè uvwànukù misangu yònsò. Kwèna mucivùlùke to, bwalu wèwè uvwa ànu cyambiibwa cyanààna mu Nzambì. Wèwè uvwa ànu mu ngeelèlù Wendè wa meeji. Dìna dyèbè mene, bu ne òvwaku mu Mukàndà wà Mwoyi, dyàkatèèkiibwa kuntwaku kumpàlà kwà difùkiibwa dyà dyulu ne buloba. Yèyè ùvwa mumanye cyùvwà.

45 Ndi ànu ngàmbe eci, kí mbwà kusambakaja dilongesha to, kàdi bwà kudyòlòlola, bwà twamòna mwà kuumuka ku diciina edi ne bwòwà. Kwèna mumanyè ne wèwè udi nganyi to. Kí nne nenwikale nàнку to, kàdi mpindyewu nwénù nudi bânà bàà Nzambì. Nwamònu's, nwénù nuvwa misangu yònsò ànu bânà bàà Nzambì. Nwamònu anyi?

46 Bwalu pàvwà Nzambì awu neebè mu meeji Èndè ku cibangidilu, bìdi bikèngela ne wikale nàнку, cimwè citùpà cyà ku wèwè, Mwoyi wèbè ùdi munda mwèbè mpindyewu amu, byàkakèngela bwà kwikalawù ne Nzambì kumpàla aku. Èè, pàdiYe, kumpàla mene kwà Yèyè kulwa wà bàlenga ne byanza pànù pa buloba, kumpàla kwà kwikalaku cintu kampànda, kàdi Nzambì, wèwè uvwa umwe wa ku byambiibwa Byèndè. Yèyè ùvwa mumanye civwà dìnà dyèbè mwà kwikala. Yèyè ùvwa mumanye diikala dyà nsuki yùvwà mwà kwikala naayi. Yèyè ùvwa mumanyè byònsò bwà bwalu bwèbè. Cintu cimwèpelè cyàkenzeka ncyà paùvwà wèwè, mwikale ngènzàmpèkààtù. . .

47 Bààbùngì bàà kunùdi bàdi mwà—bàdi mwà kubwela naanyi mu bwobùmwe pa meeji aa. Paùvwà mwànà mukesè wa balùme, anyi mwànà mukesè wa bakàji, uvwa mwà kunyunguluka ne kùvwa mwà kwikala bintu kampànda bìvwà ànu bifwànyine, pàvwàbi kabìyi mwà kutàcisha bânà bakwàbò to, kumwenekabi bu ne kùvwa cintu kampànda munda mwèbè amu civwà cyèla lubilà. Kùvwa Nzambì mwaba kampànda, nànsha nàнку wèwè uvwa ngènzàmpèkààtù. Nudi bavùlùke aci anyi? Cyà bushùwà. Mpindyewu aci civwa cinyi? Aci civwa mmwènekèlu mukesè wa Mwoyi munda mwèbè díbà adi.

48 Ne pashìshe paanyimà pàà katanci, wèwè kuumvwa Èvànjeeliyò. Pàmwàpa wàkaya mu èkèleeziyà, wèwè kubàkula *cikampànda* ne *cikansanga*, ne kutànkakana uumuka ku dīgumba uya ku dīgumba. Kàdi dīgà ditùkù, mùvwà mwikàle citùpà cyà Nzambì, bìvwà bikèngela bwà wèwè kwikala citùpà cyà Dìyi. Nènku pawàkuumvwa Dìyi, udi mumanyè kùdi mufùmìne, uvwa mumanyè civwà Bulelèlè. Wèwè uvwa misangu yònsò, dimiinuu òvwà munda mwèbè misangu yònsò. Dìyi kumòna Dìyi òvwà munda mwèbè, òvwàmù kumpàlà difùkiibwa dyà dyulu ne buloba, kumòna Dìyi ne wèwè kulwa ku Dyòdi.

49 Byenze bu kabwalu kànyì kalonda kakesè aku bwà kâna kâà mukanku, bwà mùshindù ùvwà kâna kâà mukanku aku katooyila mu cyâdi cyàà nzòòlo wa cikuka. Ne kakwàcikwètù aka kàvwa kèndakana ne mikùmbù yà nzòòlo, yéyè awu, pàvwà cikuka cituuta cyokò, kàdi yéyè kàvwa ùmvwa dikùmà dyà cyokò dyàci adi to. Nènku—nènku twànà twà nzòòlo atu, cyàkudyà cyàtù civwàtu naaci mu cipangu amu, yéyè—yéyè kàvwa ùcyùmva to, nànsha mùshindù ùvwàtu tucyènzà. Kàdi kùvwa cintu kampànda munda mwèndè amu, civwà cimwèka cishilàngàne ne civwà nzòòlo ayi, bwalu ku cibangidilu yéyè ùvwa mukankù. Ncyà bushùwà. Dimwè ditùkù maman wèndè kulwayè wènda ukèbangana nèndè, ne, pàakumvwàye lubilà lwà mukanku alu, lùvwa lushilàngàne ne cyokò cyà cikuka cyà nzòòlo.

50 Nènku mùshindù awu ngùdìbi ne mwena kwitabuuja yònsò muledìbwe cyàkàbidi ewu. Udi mwà kuumvwa tèlòlòjì yònsò ùdi muswe awu, ne dipangakanangana dyònsò dyà dyenza kùdi muntu adi; kàdi pàdi Díyì dipenyèsha kuntwaku, díbà adi cintu kampànda cidi cikupya, wèwè kulwa ku Dyòdi. “Nwènu bàvwa musangu kampànda bafwè mu mpèkaatù (mwoyi awu) bàdiYe mufùùlùlùle.” Bikèngela kwikalè Mwoyi kuntwaku bwà kuwùfùùlulula, dyàmbedi. Nzambi, ku didyànjlila-kumanya Dyèndè, ùvwa mumanyè bintu byònsò. Nènku tuvwa badyànjlila kulongolola bwà kwikala bânà bàà balùmè ne bàà bakàji bàà Nzambi. “Nwènu bàvwa kale wàwa bafwè mu mpèkaatù ne matomboka, mutùvwa twètù bwònsò bapicile bikondo byà kale, kàdi Yéyè kutùfùùlululula.”

51 Tàngilàayi Pólò, pàvwà Pólò mwena tèlòlòjì munène. Kàdi pàakatwilanganàye mpàla ne mpàla ne Díyì adi, Yesù, wàkafùùluludiiwà. Wàkalwa ku Mwoyi ne lùkàsà lwònsò, bwalu ùvwa mulongolwela bwà kwikala cyòci aci. Kùdi... Yéyè ùvwa cituùpà cyà Díyì; ne pàvwà Díyì dimòne Díyì adi, civwa ngiikàdilù wèndè. Dituuta dyà cyokò dyònsò dyà bikuka byà nzòòlo adi, mu èkèleeziyà yà orthodoxes, kabyàkapeta bwenzeji pa yéyè nànsha; yéyè ùkaavwa mumòne Díyì. Dìvwa citùpà cyèndè. Yéyè ùvwa mukankù. Kàvwa nzòòlo to; ùvwa ànu mu lupangu lwà nzòòlo alu pàmwè naayi. Kàdi yéyè ùvwa mukankù, ànu kwìnè kwònsò aku.

52 Ntu muumvwe bwalu-bulonda bwà bwena abu, ngèèla meeji ne kabyèna byùmvwika byà binyagakaja cijila to, bwà kâna kâà dibata katooya kùdi nzòòlo wa cikuka, musangu kampànda. Yéyè kàvwa mwà kuumvwa kantu nànsha kàmwè to. Kakwàcikwètù kâà mmwènekèlu wà lukutukutu, kalumyànà kâà pabwàkù, nènku kàvwa mwà kuumvwa lupwishi alu ne bintu byònsò abi nànsha. Bàvwa bànàyila mu lupangu lwà nzòòlo alu. Kàdi dimwè ditùkù cikuka cicolè aci kulombolaci twànà twàci tukesè atu paanyimà pàà lupangu apu, ke kakwàcikwètù kukòka mupùuyà wà màyi. Èè, kwasakù lwendu

katàngile ku mâyi aku ne mwàkù pààkù mwónsò muvwàku mwà kuya amu. Bwà cinyi? Kacya kàvwa mwanji kufika ku dijiba aku kumpàla to. Kacya kàvwa mwanji kubwela mu mâyi to. Kàdi pèndè mwikale dibata, ànu kwónsò eku. Cintu cìmwèpelè cìvwà cìkèngela bwà yèyè kwenza nkupingana mu yèyè.

<sup>53</sup> Ki cintu cìmwècìmwè aci cìdì mwena kwitabuuja. Kùdi cintu kampànda mu yèyè amu, cyà ne, pàdiye utuutakeena ne Nzambì mpàla ne mpàla, ùdi ùdìpetulula. Dimiinu adi dìdi munda mwèndè, ne dìdi difùùluludiibwa. Ekèlekèle, ncyà bushùwà, ne yèyè ùdi ùbùuka kule ne bintu byà pa buloba. Bìdi bìvwijiibwa bifwè kùdiye. Ekèlekèle, ndi mvùluka ne, twètù bónsò aba twàkadi ne nsòmbelu wetù, mu cikondo cyà kale, mu bintu byà buloba abi. Kàdi patùdì ànu tupyàngana ne Cintu cilelèlè aci, cintu kampànda cìdì cìtùfùùlulula, kaadimiinu kakesè kàdì kàlwa ku Mwoyi aku, dìbà adi bintu byónsò byà pa buloba bìdi bìbolela ànu apu mene. Katùvwa kàbìdì ne dijinga dyàbì to.

<sup>54</sup> “Ewu udi mulediibwe kùdì Nzambì, kèna wènza mpèkaatù to. Mukuukwidi ànu musangu ùmwè ùdiye ùkezudiibwa kènà kàbìdì ne cìvùlukilu cyà mpèkaatù to, kènà kàbìdì ne dijinga dyà kwenza mpèkaatù nànsha.” Bwalu bwà mpèkaatù mbupwè kujike. Udi ulwa cìtùpà cyà Nzambì, mu Kilistò. Kilistò wàkafwà bwà kukupikula.

<sup>55</sup> Mpindyewu anji elààyìbì ànu meeji ku byónsò bitùvwà mwà kwikala abi bu kabùyì bwà Nzambì. Kàdi Nzambì, mu luse Lwèndè lubanjike, mùshindù ùdi Ye mutùpikùla dilòòlò edi’s wè! Mpenyè patùvwà bafwànyine kwikala dilòòlò edi bu kabùyì bwà luse lubanjikè lwà Nzambì kutùdì?

<sup>56</sup> Musangu kampànda buloba ebu bùvwa butàmbe kwikala mu mpèkaatù, muntu ùvwa mufikishe cinyangu ku dilwa pa buloba mu mùshindù wà ne byàkabungamija mene ne Nzambì mùvwàYe mwenzè mene muntu. Mutù mujimà ùvwa ànu mpùta wa tufinà, mubidi mujimà, ne Nzambì mene kubungamijiibwaYe cyàkenzelàYe muntu mene. Ki kwambaYe ne: “Nèmbùtule muntu Ùndì mufùke awu.” Neàmubùtule bwalu kènà ne cìngà cintu to ànu mushikì wà cinyangu.

<sup>57</sup> Nènku bukwàbantu bwónsò bùvwa mwà kwikala bukùpùdìibwe cikondo aci, kàdi Nzambì, mubanji mu luse, kàvwa mwà kulekela udi kàyì mumanyè bwalu ùbùtuka pàmwè ne mupille nànsha. Nènku kuyaYe ne kuseba njila bwà aba bàvwa baswè kulwilamù, bàvwa baswè kwenza cìvwà cyakàne. Yèyè, kwenza njila wa luse bwà aba bàvwa bajinga luse, ne kulongololaYe bwàtu. Mu ngaakwilù mukwàbò, Wàkatèeka mapwàpwà kampànda pa mikankù Yèndè, bwà bààmòna mwà kubùuka pamutù pàà cilumbulwidi, ne kubènga kutùkina ne nzòòlo. Kàdi Yèyè—Yèyè wàkenza njila wa dipàndukila, mu matùkù à Noà. Eci cyàkaMufikisha bwà kwenza nànkù, bwà kumulongolola, bwalu Yèyè ùvwa mubanji mu luse.

58 Kàdi paanyimà pàà Yèyè mumanè kulongolola njila bwà bantu ne pashìishe bwòbò kucibènga, mpindyewu, cyàkabèngelàbo mbwalu kakwèna cintu nànsha cimwè munda amu bwà kucyàkidila to. Kakwèna cintu nànsha cimwè bwà kucyàkidila to. Maamù wanyì ùwwa ne ciibidilu cyà kwamba ne: “Kwèna mwà kupeta mashi mu tuunèpà to, bwalu kakwèna mashi mu tuunèpà to.” Pa nàнку kwòkò kakùyì mmwènekelu wa Mwoyi munda amu bwà kuCyàkidila to, dībà adi kaCyèna mwà kwakidiibwa to.

59 Ki bwà cinyi Bafaalèsà bàvwa mwà kutàngila Yesù mumpàla, ne kuMubiikila ne: “Beelèzèbùlà,” bwalu kakùwva cintu nànsha cimwè munda mwàbò bwà kuMwakidila to. “Kàdi bwònsò bàdi Taatù muMpèèshe,” mwàkambàYe, “nebàlwe kùNdì.” Kùdi—kùdi mùshindù kampàndà wikalàci mwà kufidiibwa.

60 Udi mwà kwakula ne bantu misangu mikwàbò mu misèèsù, kuyiikila naabò pa bìdi bitàngila Mukalenge, bàdi bàseka ànu bakutàngile mumpàla amu. Èè, tudi ne cyà kucyènza, nànsha bìshi. Kàdi tèelejààyi: “Kakwèna muntu nànsha umwe udi mwà kulwa kùNdì pàdi Taatù Wanyì kàyì mumukòke dyàmbedi to.” Bikèngela bwà Nzambi ènzè dizolà. Bikèngela kwikale Mwoyi. “Ne bwònsò bàdiYe muMpèèshe, nebàlwe kùNdì.”

61 Wàkalongolola cintu bwà aba bàdi baswè bwà kupikudiibwa. Wàkalongolola cintu bwà aba bàdi baswè kwondapiibwa. Ne pashìishe bwalu bwà Wàkenza eci, kuMuvwijaci mubanji mu luse, ànu mùtùYe misangu yònsò mubanji mu luse. Cìdi ne cyà kwikala ne, wèwè mubènge Eci, kakwèna cintu nànsha cimwè cishààle to ànu Cilumbulwidì, bwalu mpèkaatù ùdi ne cyà kulumbulwishiibwa.

62 Pàlò, pààkabwelaye mu—mu mbù, bu mutentudi, mumòne ne ùwwa mwà kubwelamù bu mwàkabwela Mòsà amu. Mòsà ne cilwilu cyèndè, ne Pàlò ne cyèndè cilwilu, bùbìdi bwàbò bàvwa ne cyà kubùtukila mu mbù, muvwabi bimwèka’s. Kàdi Nzambi, mubanji mu luse, wàkaseba njila wa dipandukila bwà bàna bàà beena Ebèlù abu, (bwà cinyì?) bwalu bàvwa bènda bàlonda mu njila wa mudimu, bàvwa bènda bàlonda mu Dìyì.

63 Mpindyewu ki mùshindù ùmwèpelè wà kupeta luse ngwòwò awu, ngwà kulonda mèyì à kulonda àdi Nzambi mutùpèèshe bwà kulonda awu. Ke mùshindù ùmwèpelè ùdiYe mwà kuleeja luse awu’s, mpatùdi tulonda cìdiYe mwambe bwà kwenza.

64 Byènze bu muyiiki mukesè wà dikòkangana wà matùkù mashààle aa, ne mwambi uvwa mwambe ne mèmè mvwa nyiisha Dilongesha dyà bàpostòlò mu ditùkù edi. Ngèèla meeji ne mvwa mucyakùle kwenji dilòòlò dimwè anyì àbìdi, anyì musangu kampànda, bwà mùshindù wàkambàye ne: “Udi uteeta bwà kubweja, mu cikondo eci, Dilongesha dyà bàpostòlò.” Yèyè ne: “Cikondo cyà bàpostòlò cyàkajika, ne bàpostòlò.”

Ki mêmè kumukonka ne: “Èè, udi witabuuja Dîyì anyì?”

Yèyè ne: “Èyowà.”

65 Mêmè kwamba ne: “Bwàkabuulwibwà 22:18 ùdi wàmba, ne: ‘Ewu yònsò wadidìngà kuumushila Dîyì òm̀wè ku Eci, anyì kusàkìdilaKù dîyì òm̀wè,’ kì ng’ànù m̀yèyè àbìdì nànsha; Dîyì òm̀wèpelè, kuumusha Dîyì òm̀wè.”

Yèyè ne: “Ndi ngiitabuuja aci.”

66 Mêmè ne: “Dìbà adi ndi mwà kukwambila mwaba wùvwà cikondo cyà bàpostòlò cìfidìibwe, wùvwà Mabènesha à bàpostòlò mafidìibwe kùdì Èkèleeziyà; mpindyewu wèwè ùngambila mwaba wàkacyumushila Nzambì mu Èkèleeziyà, ku Dîyì. Kwèna mwà kucyenza to; kacyenaku to.” Mêmè kwamba ne: “Mpindyewu vùlukàayi ne, Peetèlò, mu Ditùkù dyà Mpenta, yèyè nguvwa mu—mubweji wa cikondo cyà bàpostòlò mu cyalu. Ki kubàmbilaye bwònsò ne: ‘Nyingàlálaayi, nubàtiijiibwe mu Dìna dyà Yesù Kilistò bwà dilekelediibwa dyà mpèkaatù, ne nenùpetè kupà kwà Nyumà Mwimpè. Bwalu mulayi wùdi kunùdì, ne kùdì bânà bèènù balela, ne kùdì aba bàdì kule, bùngì bwònsò bwàbìikilàbo kùdì Mukalenge Nzambì wetù abu.’”

67 Mpindyewu wèwè muswè kutèeleja dituuta dyà cyokò cyokò dyà cikuku kampànda cyà nzòlo cyà cyena d̀ngumba, ne kwalukila bwà kwikala ne mwoyi mu maalu à mu buloba mwàmwa, dìbà adi bìdì bìleeja ne kùdì cintu kampànda cìbì. Bwalu, Aci’s n’Dîyì. “Ewu yònsò udi muswè awu, udi mwà kulwa.” Nènku wèwè ne diswa, s’mbimpè kulwa. Kàdì wèwè kùyì ne diswa nànsha òm̀wè to, dìbà adi udi mu ngiikàdìlù wa dibungama. Kàdì wèwè ne diswa dyà kulwa, lwàkù ulonda njila wa dilonda wa Nzambì!

68 Nènku Yèyè kàakupangila bwà kuuja cyàkalayàYe to. Mêmè mvwa musangu kampànda nsongà, ne mpindyewu ndi mukùlákàje, ncitukù kacya mwanji kuMumòna ùpangila mu Dîyì Dyèndè. Bwalu, Yèyè ùdi mwà kwenza cintu kanà cyònsò pa kuumusha kupangila. Kèna mwà kupangila to. Nzambì kèna mwà kupangila to. Kabyèna mwà kwenzekakù bwà Nzambì àpangilè to, kàdì kushààla Nzambì. Yèyè ùdi ne cyà kwikala nànku, bwà kwenza nànku.

69 Mpindyewu cilwìlu cyà Pàlò cyàkateeta kutentula, bwalu kabàvwa babilikidìibwe ne kabàvwa ne Mwoyi awu to. Mu. . . Mulayi kawàkafidìibwa kùdì Pàlò to. Mulayi kawùvwa mumupèsha bwà buloba bulaya to.

70 Kàdì mutentudi, ùteeta kulonda mwena kwitabuuja mulelèlè udi mubìikidìibwe ku aci, ùdi ànu ùcìdikija. Ki lutàtù lùdi naalu ndongolwelu wetù wa ntèndeleele leelù ewu ndwòlù alu, mbantu bapite bùngì bàdì bâteeta kutentula Nyumà Mwimpè, bantu bapite bùngì bâteeta kutentula dibàtiiza, bantu bapite bùngì bâteeta kutentula cikondo cyà bàpostòlò. Mbwa

beena kwitabuuja, ne bwàbù nkààyabo. Nzambi mmusebè njila, mubanji mu luse, bwà ne bânà Bèndè kabàlù kubùtuka nànsha. Yèyè mmubàsebèle njila.

<sup>71</sup> Mpindyewu, Pàlò ùteeta bwà kubàlondamù, wàkadiina mu màyi mene àkasungilà Mòsà ne musumbà wèndè awu. Mpindyewu, Mòsà kàakadiina to, bwalu Nzambi mmubanji mu luse kùdi aba bàdi bàlonda njila Wendè mulongolola. Amen.

<sup>72</sup> Nudikù mwà kumòna cìndi njinga kwamba aci anyi? Cyà ne, dilòlò edì, bantu bàdi kabàyi biitabuuja dyondopa dyà kùdi Nzambi abu, bantu bàdi kabàyi biitabuuja dibatiiza dyà Nyumà Mwimpè abu, mmunyi mùdìbo mwà kupeta cintu kanà cyònsò? Nzambi mmubanji mu luse kùdi aba biikalà mwà kuMulonda; kì mbàlonda twitabàayi kampànda to, kàdi balonda Nzambi.

<sup>73</sup> Nzambi ùdi Dìyì, ne Dyàkavwijiibwa mubidi ne kusòmbela munkaci mwètù, mpindyewu, bwà Wàmòna mwà kupatula byambiibwa bikwàbò byà Nzambi. Mubidi, Yesù, ùvwa mubidi wa Nzambi, cyambiibwà. Mòsà wàkaMumòna ùpita, citùpà Cyèndè cyà nyimà; muntu nànsha umwe kàvwa mwanji kumòna mpàla Wendè to. Kàdi mpindyewu tudi tuMumòna, tudi baMutàngile, tuMumòna bu Mulàmbù. Mpindyewu, nwamònu's, Yèyè ùvwa cyambiibwà cyà Nzambi, cileejìibwe patòòke, Dìyì adi. Ke cìvwàYe ncyòci aci.

<sup>74</sup> Nènku pàdi mwena kwitabuuja kanà yònsò ùlwa kùdi Nzambi, yèyè ùdi ùshàala cyambiibwà cyà Nzambi cyà Dìyì Dyèndè, ùdi wàngaciibwa ku mudimu bwà kumwenesha Dìyì didi dilaya bwà ditùkù adi. Nwamònu anyi? Ncyà bushùwà. Nzambi, mubanji mu luse, kacya kàtukù mwanji kutùshiya katùyì bujaadiki nànsha. Yèyè's mmubanji mu luse.

<sup>75</sup> Tudi tusangana mpindyewu ne Nzambi ùvwa ne luse kùdi Mòsà mu mbù mufwè awu amu, mu Mbù Mukunze mwàmwa, èyowà's. Pashiishe pàdiYe wàmba apa, mu Ekèsòodè 19:4, Wàmba ne: "Mvwa munwambule pa mapwàpwà à mukankù, munùtwàle kùNdi. Mubambùle pa mapwàpwà à mukankù, ne munùtwàle kùNdi!" Kùvwa bângà bantu munkaci mwà mbù awu amu, kabìdi, bateeta kutentula. Kàdi cinyi? "Yèyè wàkabàmbula pa mapwàpwà à mukankù."

<sup>76</sup> Mpindyewu Nzambi ùtu misangu yònsò ànu ùfwànyikija baprófetà Bèndè ne mikankù. Nènku cìvwa ncinyi? Mòsà ùvwa mùsànjeela Wendè. Ne bwòbò bàvwa munkaci mwà kulonda Mòsà, ne kì cìvwà mapwàpwà à mukankù pàvwàbò babambwile, bwalu ùvwa mwambùle mukenji wà Nzambi. Ne bantu bàakalonda cyòci aci. Bàvwa bènda bàlonda Nzambi pàvwàbò bàlonda Mòsà ne mukenji Wendè wà disungidiibwa apu. Kàdi Bible mmwambe ne: "Yèyè, kabàakabùtuka ne aba bàakabènga kwitabuuja abu to." Bwalu, Nzambi ùvwa mubanji mu luse kùdìbo, bwalu bwòbò bàvwa bènda bàlonda méyi

Èndè matùma. Nzambi mmuswe bwà twètù kulonda mèyi Èndè matùma.

<sup>77</sup> Tudi mwà kwamba byàmwomùmwe bwà Koolà ne bwà Datàna ne cisumbù cyàbò cyà beena bupidyà aci, bu mwàkateetabo bwà kutentula. Bàakateeta bwà kufinyika cintu kampànda mu ndongamu wa Nzambi. Kabàvwa baswè ndongamu wa muntu umwe to. Kabàvwa baswè aci to. Bivwa bikèngela kwikalabò ne cintu kampànda cyà kwenza. Koolà kwambaye ne: “Mòna’s, kùdi bantu bàà cijila kukutàmba wèwè awu, Mòsà. Udi wenza maalu bu ne wèwè ke dilobo òmwèpelè pa . . . anyi lusoka lùmwèpelè lwà mushinga pa dilobo, èyowà’s.” Ki yèye ne: “Ndi—ndi . . . kabivwa bikèngela bwà wèwè kwenza nàнку to. Kàdi kùdi bantu bààbùngì kaaba aka.”

<sup>78</sup> Ne Mòsà ùvwa mumanyè ne ùvwa ne cyà kuya ne bânà abu mu buloba bulaya, bwalu mulayi ùvwa mumupèèsha. Ne yèye ùdi ne cyà kuya nààbò ku buloba bulaya.

<sup>79</sup> Nènku, leelù ewu, Nyumà Mwimpè ùdi kaaba aka bwà kushindika Dìyi dyà Nzambi, ne aci’s ke dipwàpwà dyà mukanku patùdi benzèjìbwe bwà kwendela; kí n’tèlòjì kampànda mukwatakaja kùdi bantu to. Kàdi bidi bikèngela bwà twètù kwendela pa mapwàpwà à mukankù, too ne ku Buloba bulaya.

<sup>80</sup> Nènku mwab’ewu bwòbò bàvwa ne cyà kupeta musumbà wà nzòlo kuntwaku, Koolà kwela meeji ne, nudi bamanyè’s, bwà kuseemena mwab’awu, kutentula cikampànda, mukankù awu. Kàdi pààkenzabo nàнку, Nzambi kwamba ne: “Tàpulukà naabò,” ne Yèye kumina buloba abu. Úvwa mwà kwikala mumìnè cintu cijimà aci, bufùki bujimà abu, kàdi Nzambi ùvwa mubanji mu luse kùdi aba bàdì bàteeta bwà kulonda Dìyi Dyèndè. Misangu yònsò, Nzambi mmubanji mu luse. Bààbùngì bàà kùdibo kulwabò ku luseke lwà Mòsà, ki Nzambi kukàngulayè buloba ne kumina mwena bupidyà. Yèye, mwena—mwena bupidyà, neàbutukè misangu yònsò.

<sup>81</sup> Aba bàvwà kabàyi biitàbùùje, nànsha mùvwàbo bapàtuke ne bende bwà katanci kampànda, kàdi, bwòbò, Yesù wákamba ne: “Bwòbò bàdi, muntu ne muntu, bafwè.” *Bafwè* mbwena kwamba ne “dibutudiibwa.” Mbafwè. Anji elààyibi meeji kùdìbo. Bapàtuke, bamòne bishimà byà Nzambi, bamòne cianza cinène cyà Nzambi, basànke ne mana; ne bapàtuke kuntwaku ne kutèèleja muntu dìnà dyèndè Baalàmà, wàkakònyangaja njila wa Nzambi, ku dilongesha dyèndè dibèngàngàne ne Dìyi ne: “Tudi bwònsò beena muntu, nàнку tùdisangàayi ànu pàmwè.”

<sup>82</sup> Aci’s ndongolwelu mukwàbò wa Baalàmà munkaci mwà kajuuka, leelù ewu ne: “Tùdisangàayi bwònsò pàmwè.” Kabayàkukumbana to. Twèndàayi ne Mukankù, Yèhowàh Mukankù. Nwènù nudi twànà twà mikankù.

<sup>83</sup> Kùdi ànu bàsàtù cyanàànà bààkasungidiibwa mu musumbà mujimà awu; Mòsà, Kaalèbà, ne Yoshùwà. Bakwàbò abu

bàakabutuka mu cipèèlà; Yesù wákamba nànkù, mu Yone Munsantu nshapità mwi6. Nzambì, mu luse, kàyi mufwànyine kubàlekela bábùtuka to, bwalu, ne bakwàbò beena bupidyà abu to. Bàakafwila bwònsò ànu mu cipèèlà amu, kàdi's mbafwè. Nzambì wàkasùngila Mòsà ne beena kwitabuuja mikankù abu, bwalu bàvwa ne kaneemu ku Dìyi Dyèndè.

<sup>84</sup> Nènku leelù ewu, mulundà wanyì, mùshindù wùmwèpelè wutùdiku mwà kupeta dyèsè kùdi Nzambì; Nzambì mmubanji mu luse, leelù ewu, kàdi bìdi bikèngela bwà twètù kuneemeka cidìYe mwambe pa bwalu abu. Kwèna ànu mwà kwangata cidì muntu mukwàbò mwambè to. Bikèngela wàngatè cidì Nzambì mwambè. Wákamba ne: “Dìyi dyà muntu yònsò dìikalè mashimi, kàdi Dyànyì dilelèlà.”

<sup>85</sup> Leelù ewu tudi bayiilè ne: “Cyònsò cidì cikèngela bwà wèwè kwenza,” mu myaba yàbùngì, “nkukashààla wa mu èkèleeziyà, kwikala ne twitabàayi kampànda, anyi cintu kampànda cyà mùshindù awu; anyi kwamba disambila, anyi kufùndisha dìnà dyèbè mu mukàndà kampànda, anyi kwikala mumyaminyiibwe anyi mubàtijiiibwe mùshindù kampànda, anyi cintu kampànda bu nànkù. Kì cyònsò cyùdi ne cyà kwenza.” Kàdi's aci mmafi.

<sup>86</sup> Kwikala mukankù wa Nzambì, bikèngela ùlonde Dìyi, ku ditùkù ne ku ditùkù. Bikèngela ùtungunukè, ùdiishiibwa ne Dìyi.

<sup>87</sup> Mpindyewu tudi tubàsangana, paanyimà pàà dìbà edi, banungana kàbidi, bàcyòka mu diitabuuja, paanyimà pàà Nzambì mumanè kubàleeja luse. Nènku tudi tubàsangana banungana bwà Nzambì, ne, pààkenzabo nànkù, ki bôbò bàvwa munkaci mwà kufwà ne disùmiibwa dyà kùdi nyòka abu. Èè, mbacikùmbànyine. Ncyà bushùwà ne mmwòmò. Muntu kanà yònsò udi mwà kutùpakaja Dìyi dyà Nzambì ne kwenza bintu bìvwabo benza ebi, bàvwa bakùmbànyine bwà kufwà. Dijinga dyà muntu yònsò wa kùdìbo, mukùmbànyine kufwila mu cipèèlà.

<sup>88</sup> Kàdi pàvwàbo bàsaama bikolè be mu mùshindù wà ne ngàngàbukà Mòsà ne nànsha umwe wa kùdìbo kàvwa mwà kwangata cintu nànsha cimwè pa bwalu abu to, ne bàvwa bàpunga ne lufù ku binunu; kàdi Nzambì, mubanji mu luse, Yèyè wàkaseba njila wa dipàndukila bwà aba bàdi baMwitàbùùje. Yèyè wàkacyenzela bwanga, mu dibàndisha nyòka wa cyamù cyà mitakù. Nzambì mu bubanji Bwèndè. . . Nzambì wàkaseba njila wa dipàndukila bwà bàna Bèndè bàdi bìitabuuja bààfwànyina mwà kwondapiibwa.

<sup>89</sup> Nzambì ùdi ùcyùka cintu cyònsò cidì kacìyi cyènda bìmpè, cintu cyònsò cyùdi upicilamù aci. Lwendu lwònsò lwà mwoyi, Nzambì ùdi ùkucyùka. Wèwè udi mwan'Èndè, ne Yèyè mmubanji mu luse. Ùdi muswè kucyènza bwèbè wèwè.

<sup>90</sup> Bantu bààkenza mpèkaatù pashiishe, mu kwangata cintu cimwècimwè eci cidì Nzambì mwenze difuta dyà cibawu



bwàbù, ku nyòka wa cyamù cyà mitakù, udi uleeja mpèkaatù mumana kulumbulwisha, ne bwôbò kuvwija dipà adi lupingu lwà dikuukwila. Ne aci kwenza kàbidì mpèkaatù. “Nzambì kàadyàkwabanyanganakù butùmbì Bwèndè ne muntu nànsha umwe to.” Ki bwà cinyi, katwèna mwà kwikala ne nzambi yìbidì, yisàtù, yinaayi to. Kùdi Nzambì ànu umwèpelè. Yèyè kàadyàkwabanyangana butùmbì Bwèndè ne cintu cikwàbò nànsha cimwè to. Yèyè ùdi Nzambì, nkàâyendè, nwamònu’s; nàнку bu mùdì bampàngaanù ne nzambi yàbùngì. Tudi ne Nzambì umwèpelè, kàdi Yèyè kàadyàkwabanyanganakù butùmbì Bwèndè ne mukwàbò to, anyi Yèyè kàadyàkulekelakù cintu nànsha cimwè ciikàle lupingù kumpàlà Kwèndè. Nànsha mùvwàYe mwenze difuta dyà cibawu bwà bantu, ne civwa n’Dìyi dyà Nzambì, civwa cyà bushùwà; kàdi pàakafikàbò ku dicìvwija lupingù, dìbà adi kubwelabò mu lutàtù.

<sup>91</sup> Mpindyewu aci’s cidi ànu cintu cimwècimwè aci, ngèèla meeji, cidi cyenzèkèle bikondo byètù byà èkèleeziyà. Nzambì mmutùtùmìne mukenji wà Martin Luther ne mukenji wèndè, John Wesley, mukenji wà mpenta, kàdi citwàkenza naawù ncinyi? Cintu cimwècimwè menemene cyàkenzabo ne nyòka wa cyamu cyà mitakù, twètù kucìvwija lupingù lwà dikuukwila ne: “Ndi wa mu *cikampànda*, ne ndi wa mu *cikansanga*.” Nudi numòna’s, wèwè udi wa mu cintu kampànda kakùyì meeji matòòke àdì maswikakaja ne dikuukwila dishùwashùwàle dyà difwànà dyà Nzambì dyà Dìyi.

<sup>92</sup> Cyàkenzekà ncinyi? Bible, mbatwambile mu Bible, ne: “Mupròfetà wàkangata lupingù alu ne kulùnyangakajayè.” Àlèluuyàh!

<sup>93</sup> Cidi citùkèngela mu cyalu leelù ewu mmupròfetà wìkala mwà kunyangakaja lupingù lwà màngumba, bàdì bèèla meeji ne bàyaaya mu Dyulu ne bwalu mbàà twitabàayi kampànda anyi dìngumba kampànda; bikèngela cinyakajiiwbwè ne cyòshiiwbwe butubutu, cimanshiibwè. Nzambì mmùle tètè ne luse. Yèyè mmubanji mu luse. Mu ditùkù ditùvwa bafwanyine bwònsò kwikala mu cimvundù cinène cyà mîdimà kuntwaku, kàdi Nzambì, mubanji mu luse, mmutùtùmìne Nyumà Mwimpè mushùwashùwàle, ne dyumvwija Dyèndè Yèyè mwine dyà Cyòci aci, ànu mwab’ewu mene mu nzùbu emu dilòòlò dyònsò. Nzambì, mubanji mu luse Lwèndè, mùshindù mwine utùdì tuMusangana mwikàle’s wè! Èyowà’s, mukalenge.

<sup>94</sup> Mpindyewu cyònsò cìvwàbò bèèla meeji ne bàvwà mwà kwenza cìvwa ànu kuya ku nyòka ewu, anyi cintu cikesè cìvwà Nzambì mwenze kuntwaku, cìvwàye mwambile Mòsà bwà kwenza ne kulembeleja ku dikunji, ne bàvwà mwà kwondapiibwa kakùyì meeji matòòke nànsha àà kànà. Bààkiimana ànu cyanàànà ne kutàngilakù. Nènku kubangabo kukavwija lupingù lwà bàkuukwila, ke Nzambì kutuma mupròfetà mwaba awu ne kukànyangakajayè.

<sup>95</sup> Mpindyewu, bwônsò bààkabèngà kutàngila nyòka awu mu cipèlèlà abu, bààkabùtuka. Mpindyewu Nzambi ùdi ùseba njila, kàdi wèwè ubènga bwà kumutàngila, bu wèwè mwà kushààla musòmbe dînsambwà dyà mùsèèsù, wèwè mwà kushààla mukwàte ku twitabàayi kampànda kàdi kubènga kutàngila buludi mu Dìyì bwà kumòna ne Mbulelèlà anyí to; bwônsò bààkabèngà bwà kutàngila, bààkabùtuka. Ne Nzambi ùtu Nzambi wa kàyì ùshintuluka to. Ne bwônsò bààkabènga bwà kutàngila, bààkabùtuka. Ki mùdìbi kàbìdì leelù ewu, cintu cìmwècìmwè aci.

<sup>96</sup> Dìbà adi bantu kwenzabò mpèkaatù pashìishe, ne ànu mutùbo bènza misangu yònsò, ne kucìvwijabò—kucìvwijabò lupìngù, ùcìvwija ci—ci—ci. . .kupeta, ùteeta kupeta lwondapu kakùyì meeji matòòke nànsha, ne “mbàà ku cintu kampànda,” ne mùshindù utùdì twenza leelù ewu. Nènku mpindyewu tudi tumòna dîbà adi ne, dishìilangana dyà bwalu abu, òvwa ne, Nzambi. . .

<sup>97</sup> Cìvwa ndifuta dyà cibawu dîmpè ne cimanyinu cîmpè bwà cikondo aci. Mu cikondo aci, cìvwa cîmpè. Kàdi cìvwa ànu ne cyà kwikala nànu bwà cikondo aci, bwà lwendu alu. Bwà aci's ki kùvwàci mwà kukwàcisha, bwà lwendu *alu*.

<sup>98</sup> Ne mukenji wàkatwàlà Martin Luther, wa dibingishiibwa awu, ùvwa mwîmpè bwà cikondo cyà Luther. Ki kùvwàwu mushìkìdìle aku.

<sup>99</sup> Dijidiibwa òvwa dîmpè mu cikondo cyà Wesley. Ki kùdici cishìkìdìle aku.

<sup>100</sup> Pashìishe tudi tubwela mu cikondo cyà mpenta. Ne dyalujilula dyà mapà ncintu cîmpè cyà menemene, cìvwa cîmpè mu cikondo aci, kàdi tudi tupìta ne pa aci mpindyewu. Tudi bayè bapìte apu, bulelèlà ànu mùdìbi ne kùdì buloba emu. Bìkèngela bwà twètù kuya kupìta ne cintu eci, bwalu tudi benze naaci cintu cìmwècìmwè cyàkenzàbo kumpàla aci, kucìvwija lupìngù. “Mémè ndi wa mu bulongàme bwàci *ebu*, ndi wa mu bulongame bwàci *abu*.”

<sup>101</sup> Nzambi neàtume muntu kampànda wìkala mwà kuingutula cintu aci ne kucisùsulula mu tupese, ne kushìndika Dìyì Dyèndè, Dìyì mu kaabujimà. Mònaayi. Butùmbi bwikale kùdì Nzambi's wè! Mpindyewu tudi tumòna ne aci ncilelèlà. Nzambi, mmubanji mu luse Lwèndè!

<sup>102</sup> Pashìishe pààkanyangakajà mupròfeta eci, cyàkabàshiyà kabàyi cimanyinu cyà lwondapu nànsha cìmwè, cyà difuta dyà cibawu, bwalu lupìngù lwàbò lùvwa luyangakaja. Kàdi Nzambi, mubanji mu luse, wàkabenzela cikwàbò. Ne cyàkenzàYe ncinyì, aci? Yèyè kuvwàndulula màyi ku ciina cyà màyi ku ntempèlù, ne bààbùngì kulwàbò ne kwondopiibwa, ku dikadyèla mu màyi aa. Yesù kupwekayè ku ciina cyà màyi cìmwècìmwè eci, ne kumòna muntu uvwa muddyadije mwaba

awu mu bûngî bwâ bidimu, mwindile divwândulula dyâ mâyi. Nwamònu Nzambì, mubanji mu luse's! Nànsha mwâkavwijàbo cintu aci lupìngù lwâ dikuukwila, nànsha mwâkakèngelabi bwâ mupròfeta kucisùnsulula, Nzambì wâkabasebela njila mukwàbò, bwalu Yèyè mmubanji mu luse. Yèyè mmuswè bwâ bwòndapiibwè, ke kusebaYe njila bwâ lwondapu lwàbò.

<sup>103</sup> Mpindyewu, pashiishe aci kutùngunukaci, buloba kutàmba kulwa bwâ mpèkaatù bikolè be, dibâ dyònsò. Ne ndekeelu wa byònsò buloba kuvwijiiibwa bwâ mpèkaatù menemene mu mùshindù wâ Nzambì mufwànyine kwikala mububùtùle, kwambaYe mu Maalàkì 4 ne: "bwâ Ncilù kunyooka buloba ne mulawu." Ûwva mufwànyine kwikala mucyènzè; ànu lukonko alu cyanàànà.

<sup>104</sup> Kàdi pashiishe Nzambì, mubanji mu luse, Wàkatùma Musùngidi, Yesù Kilistò. Wàkatùma Yesù bwâ kwikala ànu Yèyè awu Musùngidi ne mwondopi. Bwalu Yèyè wàkamba ne: "Ànu mwâkabandisha Mòsà nyòka wa cyamu cyâ mitakù mu cipèèlà amu, ki mùdi Mwànà wa muntu ne cyâ kubàndishiibwa," bwâ kiipàcilà kàmwekàmwe aku. Yèyè, difuta dyâ cibawu adi, ke citùdi ne dîyi pa cyôci, kî ncìngà cintu ànu difuta dyâ cibawu. Cyakapikulà Yesù ku Mashi Èndè, ke citùdi ne dîyi pa cyôci aci's. Ne Bible mmwambè ne: "Wàkatàpiibwa mpùtà bwâ kushipa kwètù kwâ mikenji, Wàkazaajiibwa bwâ bubì bwètù, dinyooka dyâ ditalala dyètù dyàkadi pambidi Pèndè; ne ku mibùndàbùndà Yèndè twàkondopiibwa." Ki citùdiku mwâ kukànuna ncyôci aci, bwalu ki cidi difuta dyâ cibawu, citùdi twimanyina, citùlongolwela ncyôci aci. Nzambì, mubanji mu luse!

<sup>105</sup> Eci cìwva ne cyâ kwikala difuta dyâ cibawu dyâ Cyendèlèlè, bwalu Yèyè wàkaDilwila. Nzambì wàkaDilwila, mu mmwènekelu wa mubidi wa mpèkaatù, bwâ kwenza difuta dyâ cibawu dyâ—dyâ—dyâ Cyendèlèlè; ne wàkakènga mu mubidi, ne wàkafuta cibawu; ne kwalukila mu mmwènekelu wa Nyumà Mwimpè, bwâ kushindika difuta dyâ cibawu adi. Mwaba ùwva nyòka wa cyamu cyâ mitakù nànsha umwe anyi divwândulula dyâ mâyi nànsha òmwè kadîyi mwâ kucyenza to, cyònsò cìwva cifunkuna ànu ku Difuta dyâ cibawu dipwàngàne adi. Nzambì, mubanji mu luse Lwèndè, mmwènzè cyôci eci.

<sup>106</sup> Mpindyewu, leelù ewu, bu mùdibi ne nditùkù ditùdimu ne mwoyi, tudi bapicile mu bikondo byâ èkéleeziyâ ebi ne buumúshe bintu byònsò ku Cyôci eci ku dyumvwija. Beena tèlòlòjì bèètù bàà ditùkù edi mbamanè kujìmija aci cibadi cyâCì ntàntà mule be. Bàdi bàCyumusha cyònsò ku dyumvwija, ne ncyâ ditùkù kampànda dikwàbò, cikondo cikwàbò kampànda, cintu kampànda cikwàbò, cyâ kale wàwa, cyâ kukaadi ntàntà mule mupite. Nènku lwondapu lwâ kwâ Nzambì lùwva ànu lwàmba kwediibwa pambèlu, bikolè bwâ kusangana muntu kampànda wa mufwànyine kulwitabuuja.

Bàvwa bàlùseka. Kí nkwanji kupita bidimu makumi àbidi to, s'jàvwa munkaci mwà kulùseka. Beena Mpenta bàkaavwa bapàmbùkekù. Bààkatwàdija naalù mu matùkù à mbangilu, kàdi kulalukabo ku lwólù.

<sup>107</sup> Tàngilàayi mwàkenzàbo. Mpindyewu bààkaditwa mu mbilu yà cyena màngumba, bènda banyeemakanangana bwà kudyenzela muntu ne muntu twitabàayi kampànda, ne bikwàbò. Pa kuumusha ànu ne, pamutù pàà kwitaba Bukènkè, pàdi Bukènkè bùbwela apu; bàdi bàdyenza bulongolodi ne bàdikwàtakajila twitabàayi, ewu yònsò ukààlu pèndè awu, kudyenzela dilongesha ne kushààla mu dilongesha adi. Ne pashìshe kutàmbabò kuya kule bikolè mu mùshindù wa ne Nyumà Mwímpè kàciyi mwà kubwela mu èkèleeziyà nànsha. Kushààlabo lukwàbò lupingù ànu bu nyòka wa cyamu cyà mitakù, kulwaci di—dikuukwila dyà mpingù. Muntu yònsò kwamba ne: “Ndi wa mu *cikampànda*, ne ndi wa mu *cikansanga*.” Cìvwa ndikuukwila dyà mpingù. Mmu cimvundù kaayi mutùvwa tusanganyiibwa, ku cikondo cyà nshìikidilu's.

<sup>108</sup> Kàdi Nzambì, mubanji mu luse Lwèndè, mmwalùje Nyumà Mwímpè pambidi pèètù, ne mwikàle ushindika Dìyi Dyèndè dilòòlò edi bu mwàkalayàYe ne Neènzè. Nzambì wàkalaya ne Neènzè bintu ebi. Tàngilàayi cyàkenzàYe aci!

<sup>109</sup> Tàngilàayi cyàkenzàYe, mùshindù utùdi mpindyewu mwà kumòna mwàkalayàYe cikondo cyònsò bwà cintu kampànda kwenzeka. Nènku tudì tusangana ne cyàkenzeka ànu menemene mu cyòci, mwàkambàYe ne Yèyè neènzè amu, bwalu Yèyè mmubanji mu luse Lwèndè, bwà kwikala misangu yònsò ànu ne luse bwà kuuja Dìyi dyònsò dìdiYe mulayè adi. Bikèngela bwà Yèyè kucyènta, ne misangu yònsò, bwà kushààlaYe Nzambì. Ùdi wènta eci misangu yònsò, Dìyi Dyèndè ditu dikùmbana misangu yònsò mu movù wàDi. Dimiinu Dyèndè dyàkamyaminàYe mu buloba adi. CyàkenzàYe ncinyi? Yèyè wàkaditèeka mu Dìyi kaaba aka, ne aci's ke dimiinu. Nènku dîbà dyònsò dìdi cikondo cikùmbana, dimiinu adi dìdi diboba, ne pashìshe dilongolola dipàtuka. Nènku Yèyè wàkacilaya, ne cyòci kwenzeka nànkù.

<sup>110</sup> Mpindyewu katùvwakù bakùmbànyine bintu ebi to. Katùvwa bakùmbànyine mabènesha à Nzambì aa to, bwalu tuvwa bapàtùke balonde maalu à pa buloba, bayè mu cilèma cyà Kaayinà. Kaayinà, kwibaka cyoshelu cilenga ne èkèleeziyà mulenga, ne kutèkapù bilongò, ne kwela meeji ne ke cìvwa bwalu aci, “Cìvwa mmusumbà wà bimuma byà pommes anyi byà poires, anyi byà grenades, anyi ne ncinyi cìvwàku aci,” cìvwa tatwèndè ne mamwèndè badyè mu budimi bwà Edènà, cìvwa cibàpàtwishemù. Ke yèyè kucilàmbula Nzambì, kàdi Nzambì kucibènga.

<sup>111</sup> “Kàdi Abèlè ku diitabuuja wàkalàmbula Nzambì mulàmbù mwímpè kutàmba Kaayinà.”

112 Nènku, leelù ewu, Bible mmwambe mu Yudà, ne: “Bààkalonda njila wa Kaayinà; kubùtukabo mu ditomboka dyà Koolà.” Nwamònu ne: “balonde njila wa Kaayinà,” kwibaka byoshelu, kwibaka maèkèleeziyà, màngumba, kuyitancisha, kuyidyundisha, ne bidimba byàbùngi bipite bakwàbò abu; babwejamù bintu, cintu cyònsò cilwalwà aci ne cidi citumpika cidiyèla muulu cyàlukila, anyi kulabulangana ku byanza, anyi ùvwa mubàtijiibwe mu mùshindù kampànda, anyi mwakule mu myakulu, anyi munyeemàkàne mutwè eku ne eku kwà nzùbu, bafùndishe dìnà mu mukàndà. Ncyà bushùwà. Ne pashiishe kubunda Bulelèlè bushùwashùwàle bùdì buyiishìibwe, kadi kuBùvila. Mmunyi mùdìbi mwà kwikala nàнку? Mònaayi ne mmu cimvundù kaayi mutùvwà tusanganyiibwa’s! Mònaayi.

113 Ne Bible mmwambè ne: “Ne bààkalonda njila wa Baalàmà, ne bààkabùtuka mu ditomboka dyà Koolà.” Kubùtuka mu ditomboka’s! Ditomboka dyà Koolà divwa cinyi? “Mòna’s, udi wela meeji ne ànu wèwè ki munsantu nkààyebè anyi? Mòna’s, Nzambì’s. . . Twètù bwònsò tudi bansantu. Èkèleeziyà mujimà ùdi mwìmpè. Yònsò. . . Twètù bwònsò tudisangisha, ki civwà cikèngelà bwà twètù kwenza ncyòci aci.” S’ki mwaba wàkabùtukilàbo awu’s, aci nàнку awu. Nènku tudi bacikùmbànyine bulelèlè. Tudi bakùmbànyine bwà kwikala nàнку.

114 Kadi Nzambì, mubanji mu luse, mmutùpulùmùne mutùpàtùle pambèlù pàà cimvundù aci kadi kutùlekela tucimòna kumpàla kwà cintu aci kufikaci kaaba aka. Mubanji mu luse Lwèndè, ne kutwàlujilayè ditabuluja dyà dyondopa dyà kùdì Nzambì, ne dilwa cyàkàbìdì dyà Bukolè bwà Nzambì. Bilondèshile bwalu-bulonda, kakùtukù ditàbuluja dikààdiku dinèngè dipite pa bidimu bisàtù nànsha. Edi ditabuluja nditungùnùke too ne ku bidimu dikumi ne bitaanu, divwa ànu midilu yà yilàkuka, eku ne eku kwà buloba. Mòna’s, mbwalu tuvwa bacikùmbànyine anyi? Nzambì, mubanji mu luse Lwèndè, kì ne mbwalu tuvwa balùjinge anyi bwalu tuvwa balùkùmbànyine nànsha, èyowà’s. Anji elààyibì meeji bwà cyàkenzalù’s!

115 Ngèela meeji ne umwe wa ku bânà bèènù bàà bakàji ànu munwemu mu Phoenix emu, udi bààbùngi bàà kunùdì bamanye’s, Mandamù Hattie Waldrop, ùvwa ne kànsère kàà mwoyi. Ne yèyè ùvwa mu mulongo wà babèèdì kaaba aka pàtuvwà tusanganyiibwa mwab’ewu Mwanèètù Moore ne mèmè musangu wà kumpàla, kùkaadi bidimu bitwè ku dikumi ne bitaanu, anyi dikumi ne mwandamukùlù. Ne ùvwa ùpùnga ne lufù, ne kànsère kàà mwoyi, ne ùvwa mufwànyine kwikala mufwè kùkaadi ntàntà mule. Kadi Nzambì, mubanji mu luse, kutùma Bukolè Bwèndè pambidi pèndè. Ne kusùngilaYè mwoyi wèndè, ne nyèyè ewu ne mwoyi leelù ewu. Nzambì mubanji mu luse!

116 Congressiste Upshaw, muntu munène. Ngèèla meeji ne yéye ùvwa mfùmù, anyi cintu kampànda, wa—wa Ba-Baptistes, wa Mpungilu wa ku Sud wa ba-Baptistes, musangu kampànda, anyi mfùmù cindondi anyi cintu kampànda. Úkaavwa mwenze byónsò. Úvwa muntu mwímpè. Wakenza cyónsò civwàye mumanyè mwà kwenza aci. Úvwa muye kùdi dinà ngàngàbukà yónsò. Kakùvwa muntu nànsha umwe wa kumwenzela bwalu nànsha bùmwè to. Úvwa mulaminyina paanshi. Bambi bàkaavwa bamusambidile. Bàkaavwa bamupòngòlwèlèlwèle ndundu yà maanyi pa mutù, bamulaabe maanyi, à kùdi bambi bashiilèshiiilàngàne myaba yónsò.

117 Dilòòlò kampànda, ku Los Angeles, mu Californie, ngènda mbànda ku cyambilu, nkùpa dísù ku musumbà wà tùkalù twà balèmà tùvwà búngi bu misangu yibidi, anyi yisátù, kupita bàdi basómbe pàapa abu, kuulu ne paanshi pónsò pàa nseke yónsò, bàtwa kumpàla ne paanyimà. Nènku díbà adi bàvwa baadije mwaba awu kalààlù kàa babèèdi kiikàle ne nsongààkàji wa bafiikemù, nsongààkàji mukesè wa Bafiike, ne—ne mamwèndè ùvwa musòme ku luseke lwèndè aku. Nènku mwanèètù úkaavwa mwelèshe mulongo wà babèèdi.

118 Nènku mvwa munkaci mwà kutàngila, nciyi mumanyè civwà munkaci mwà kupitakana nànsha. Ke mèmè kumòna ngàngàbukà kampànda, mwase binetè binène byà dipandangana naabi, munkaci mwà kupanda nsongààkàji mukesè wa bafiike, bwà lutàtù lwà pa muminu, kàdi nsongààkàji kucibukila paanshi. Ki mèmè kuzenzakana, mèmè kudyambidila ne: “Mwànà ewu udi penyì?” Nciwva mwà kumumòna to.

119 Paanyimà pàa katanci, lwà kwinshi aku, kàyi ditèkemena, nsongààkàji mutekète wipacila ku bidimu mwandamutekète anyi mwandamukùlù, bwà kushààla mucibùkile paanshi matùkù èndè wónsò à mwoyi. Nènku ke mamwèndè awu kuntwaku mutwe binù, mumònàngàne ne kusambila. Ki mèmè ne: “Ngàngàbukà ewu ùvwa mupandè mwanèèbè wa bakàji mukesè ewu,” ne mèmè kuleeja mùvwà bwalu kutùulà.

Yéye ne: “Ncyà bushùwà, mukalenge.”

120 Pashiishe kuteetayè bwà kufikisha mwànà awu ku cibumba cyà ku cyambilu. Kumwambilabo bwà ne kènji nànkù to. Kuteetabò bwà kumutùükijijabò panshi apu. Ànu bu pa díbà dyàkamutùükijijàbo adi, mèmè kudyambidila ne: “Èè, netùpetè mpungà wa kumusambidila.” Mu tusunsa tukesè. . . Pàmwàpa kùdi bantu mwab’ewu mene bàvwàku dilòòlò adi.

121 Nènku mvwa mutàngile mu batèèleji amu, mèmè kumòna nsongààkàji awu wèndà úpweka, byenze bu lwà mu—mu kajila kakesè kabùlákàne, mwikàle ne kaapòpí mu mabòko, munkaci mwà kwengeleka kaapòpí aku. Nànsha mùvwà ngàngàbukà mwambe ne ùvwa ne cyà kushààla mucibùkile paanshi matùkù èndè wónsò à mwoyi; Nzambi, mubanji mu luse, wàkatùma

Nyumà Mwímpè, ku cikèènà-kumòna, ne mwànà mukesè wa bakàji awu kujuukayè muntwamu, nènku yèyè ne mamwèndé kukwàtangana ku byanza kupwekela ku luseke alu, bènda bàtùmbisha Nzambì.

<sup>122</sup> Lwà paanyimà apu pàvwà mukulumpe kampànda musòmbe, Congressiste Upshaw, bààbúngì bàà kunùdi mbamanyè bujaadiki bwèndè. Yèyè ùvwa muntu mwímpè, mutèète matùkù èndè wònsò à mwoyi, bidimu makumi àsambòmbò ne bisambòmbò mucibùkile mu kàkalù kàà balèmà, bamusùkuma mu bulààlù; ne makombo à balèmà ku mabòko, àvwaye wènda naawù, kaciyiku kàbìdi mwà kwenda bu pa ciibidilu to. Kàdi ki yèyè awu musòmbe mwaba awu, munkacì mwà kutàngila aci. Nènku dyàkàmwè, mèmè kwela mèsù pambèlù ne kumòna cikèènà-kumòna. S'ki yèyè ulwàlwà ewu, wènda ùpwekela lwà ku lusongo lwà batèeleji abu, mwinàmije mutù wèndè, ùvwa mwà kwenda bímpè ànu bu muntu kanà yònsò ewu. Ncìvwa mumanyè ne muntu awu ùvwa nganyì to.

<sup>123</sup> Mèmè ne: “Kùdi muntu kampànda munène musòmbe paanyimà pààpa. Wàkakùluka ku ditempu pàcìvwaye mwànà mukesè wa balùme, kudituuta mu cyambudi cyà bisoosà byà nyama, ne kutàpikayè pa nyimà wèndè apu. Kutùbulabo masòsò paanshì, bwà kupangisha dizakala, pàvwà bantu bènda apu, bwà kabilengi nyimà wèndè awu to.” Mèmè ne: “Pààkalwaye muntu munène, ne kutùngunuka ne kudyunda. Nyèyè ewu musòmbe mu cijèngù cinène cyà ku Maison Blanche.”

<sup>124</sup> Ke díbà adi muntu ewu kulwa kungambila, wàmba ne: “Awu’s n’Congressiste Upshaw. Ukààtukù mumutèèlèje anyi?”

Mèmè ne: “Kacya ncitukù mwanji kumvwa bwalu bwèndè to.”

<sup>125</sup> Nènku kutùmaye kaacikòlokolo kàà dyendesha paanyimà apu ne kubanga kuyiikila, mpàla ne nyimà.

<sup>126</sup> Pashiishe mèmè kubanga kukènzakana, ke mèmè kumòna mukulumpe Congressiste ewu ùlwa, mwase lwendu mutàngile kùndi, mu cikèènà-kumòna, ànu múmvwe bímpè ne mwèndè mùvwaye kale. Nzambì, mubanji mu luse, kumujoomona mu kàkalù kàà balèmà amu, e kwendayè kàyì ne makombo to too ne ditùkù dyàkafwaye. Nzambì mubanji mu luse’s! Pàvwà bangàngàbukà bapangìle, pàvwà maalu à mamanya mapangìle, pàvwà cintu cikwàbò kanà cyònsò cipangìle, Nzambì ùvwa mubanji mu luse kùdi Congressiste Upshaw.

<sup>127</sup> Ndi ngèèla meeji ku mèmè mwine. Pàncìvwà mwànà mukesè wa balùme, ndi mvùluka bu. . . Bantu’s bàdi bàmbiikila leelù ewu ne: “cikìna bakàji.” Cìvwàku ncyà ne, mbwalu mvwa mumòne nsòmbelu wa masandi mupìte búngì kùdi bakàji pàncìvwà mwànà mukesè. Mèmè kubàkina. Kàdi ncicyèna ngèenza nàнку mpindyewu to, bwalu ndi mumanyè ne kùdikù bàmwè bímpè. Kàdi ndi mvùluka mùshindù ùvwàbì bibi

bitàmbe, byà masandi byà dikèmà. Ki mèmè kudyàmbidila ne: “Ekèlekèle, ncyà—ncyadyàkupicilakù mwaba wùdi bantu bàsanganyibwa to. Ncyêna mulonge tûlaasà twà nsongo to, pa nàнку ncyadyàkukàlongakù to.”

<sup>128</sup> Kàdi mwànà mukesè wa kale musòmbe mwaba awu, ncìyi nànsha ne mutèèlu pambidi to, ne nkooci wanyì mulamakaja ne mpengèlè mùshindù ewu, ne mpengèlè wa kulaminyina nendè awu, eku luuya lwà tûyaayi tûkamònè. Ke mulongeshi kwamba ne: “William, kwèna mûmvwe luuya anyì ne nkooci kacya wawwàla pambidi?”

<sup>129</sup> Mèmè ne: “To, mandamù, ndi mudyùmvwè ne mashika ndambù.” Ke kùntumayè lwà ku dicyùwà aku ne kukùmbajaye ndambù wa nkùnyi mu dicyùwà amu, kàdi mèmè kwamba kwoshika’s. Nènku ncìvwa—ncìvwa ne mutèèlu muvù awu mujimà to.

<sup>130</sup> Ki mèmè kudyàmbidila ne: “Bu mèmè mwà kupetakù mfrangà, musangu kampànda mèmèkù mwà kupeta kaa, nèndisumbile cingoma cyà makumi àsàtù—makumi àsàtù aci,” mvwa mwà kulwa ku Wesètè eku bwà kusòmbela mwaba ewu bwà kulemba nyama, bwà matùkù àànyi ônsò à mwoyi. Ncìvwa musweku kutàngila bwalu nànsha bùmwe bwà bantu to. Kushààla ànu kule, bwalu kabàvwa bannange to, nènku—nènku mvwa muswè ànu kushààla kule naabò.

<sup>131</sup> Ne pashìshe dîbà dyònsò dîmvwà mwà kupweka mu cimenga, bwà kuyiikila ne muntu kampànda, mmona bantu kampànda bâmvwà mumanyè, mu mùsèèsù. mvwa mwà kwamba ne: “Wetwawu, John, Jim! Bishi wèwè?”

“Kaa, wetwawu.”

<sup>132</sup> Nwamònu’s, kabàvwa baswè kunyiikidisha to, kabàvwa bàswe kwenza ní ncinyì ní ncinyì naanyì to, bwà bwalu bwà taatù wanyì ne bakwàbò bàvwà bènza maalà à whiskey abu. Kàdi kí mmèmè ùvwà wènza abi to. Ncìvwa ne cîmvwà mwenze to. Nènku mvwa mwà kwikala ànu mùshindù awu.

<sup>133</sup> Kàdi mpindyewu mèmè kwambila mukàjàànyi, kí nkwanji kupita matùkù to ne: “Cimanu cyànyi ncilamika bingoma bitàmbe bwîmpè bidiku mwà kusùmbiibwa.” Kaa, nènku ndi ngèela meeji ku bilàmbà byà kale byà manyaanu abi. Dilòòlò edi’s ndi ne nkooci mîmpè yìbìdi anyì yìsàtù. Kàdi ncìyi ne balundà anyi? Bìdi bînkèngela kusokoma mu cipèèlè mwàmwà, bwà kuya kule ne bantu. Bwalu bùdi bishi, mbwà buumùntù bwànyi anyi, mbwà kàlaasà kàànyi kalonga anyi? To. Nzambi, mubanji mu luse, kummòna mu ngiikadilù awu ne Yèye kunsungila.

<sup>134</sup> Ndi mvùluka mûmvwà mulombòdìibwe bankwàte ku mabòkò, bu muntu mufofo. Ncìvwa mwà kumòna to. Cintu cyònsò mwìsù mwànyi cìvwa cifiikùlùke; mvwa mwà kushààla mpofo matùkù àanyi wònsò à mwoyi. Kàdi Nzambi, mubanji



mu luse, wàkangalujulwila lumònù lwànyì. Mémè ewu ne bidimu makumi àtaanu ne bitaanu, ne muciiikàle ànu ne lumònù lwìmpè. Nzambì, mubanji mu luse, ki cintu cimwèpelè cìndì mwà kwamba ncyòci aci.

<sup>135</sup> Musangu kampànda èkèleeziyà kàkadi ne njila museba wa lwondapu. Bàvwa ne umwe, kàdi bààkamudyombola. Kàdi Nzambì, mubanji mu luse, wàkabàtùmina dipà dyà dyondopa dyà kùdi Nzambì. Ki Nyumà Mwìmpè munkaci mwètù, mwikàle ushìndika Dìyì ne bimanyinu byènda bìlonda. Nzambì mubanji mu luse!

<sup>136</sup> Ndi ne mabèji àbìdì anyì àsàtù mwab'ewu à bintu bifùnda ebi, kàdi ncyàdyàkuteeta kubilenga to, bwalu ndi—ndi mumanyè bìmpè ne dìbà dikaadi pabwìpì bwà kubanga mulongo wa babèèdì awu. Kàdi Nzambì mubanji mu luse Lwèndè!

<sup>137</sup> Bààbùngì bàà ku nwènù dilòlòlè edi mwab'ewu, bangàngàbuka mbanùlekèle. Kùdi bantu basòmbè mu tùkalù twà balèmà atu, pàmwàpa kabààdyàkujuukamù nànsha. Mbenzèjìibwe bwà kushàalamù. Bàmwè bàà ku bôbò, bacibùkile paanshi mu mìshindù mishiilèshiiàngàne, bwôbò (kí mbafwànyìnekù nànsha) kabèènà mwà kjuukamù to, kakwèna mùshindù wà bwôbò kjuukamù nànsha. Kàdi Nzambì, mubanji mu luse Lwèndè, mmulongòlòle difuta dyà cibawu. Kanùdìdyombòdiku to. Dyakìdilaayi. Kùdi bantu kuntu kwaka ne disaamà dyà mwoyi, kùdi bantu ne kànsèrè, bàdì bangàngàbuka bapange cyà dyanza naabò. Nudi babùle ditèkemena, bapangile dikwacisha, mu buloba ebu.

<sup>138</sup> Kàdi Nzambì, mubanji mu luse Lwèndè, mmutùme Nyumà Mwìmpè, ne ùdi kaaba aka mpindyewu mene bwà kushìndika Dìyì, bwà kujaadika ne Yèyè ùdi umwèumwè awu makèèlèlè, leelù, too ne kashidi. Mbwalu tudi bacikùmbànyìne anyì? Mbwalu Nzambì mmubanji mu luse Lwèndè! Amen. Mpindyewu ki Yèyè awu, ki Mupersona awu, M'Mukalenge Yesù awu's. Yèyè kí mmufwè to, kàdi Yèyè mmubiike ku bafwè, ne Ùdi ne mwoyi bwà kashidi ne kashidi.

<sup>139</sup> Yèyè ùdi umwèumwè awu makèèlèlè, leelù, too ne kashidi, mucikàle ànu mubanjiike mu luse Lwèndè ànu mwàkadiYe kùdi mukàjì uvwa ne disaamà dyà mashi àlwa munda awu. Ne wàkaditwa munkaci mwà musùmbà amu. Kakùvwa ditèkemena bwèndè nànsha, bangàngàbuka bàkaavwa benze mwàbò mwònsò muvwàbo mwà kwenza amu. Ùvwa ne disaamà dyà mashi àlwa munda. Ùvwa ùpùnga ne lufù. Ki kulengayè civwàlù cyà Mukòòkeshi aci. Nzambì, mubanji mu luse, kukùdimuka ne kumwambila lutàtù lwèndè. Nènku wàkondopiibwa ku disaamà dyà mashi àlwa munda adi.

<sup>140</sup> Ndumbà mukesè, wa ciipanshì kuyaye ku ciinà cyà màyi ditùkù kampànda, bwà kusuna ndambù wa màyi. Kàyì ditèkemena. Ukaavwa mwipata munkaci mwà bavirgò, mwipata

pabwîpî ne bantu, nsòmbelu wendè kàvwa mwîmpè nànsha. Ki kudyàmbidilaye ne: “Bìdi ne dikwàcisha kaayi bwà kuteeta mene’s? Ndi mubèngiibwe, ncyènà ne cyà kutèkemenà nànsha cimwè to.” Kàdi kutàngilaye, mwimàne lwà ku luseke, anyi musòmbe ku luseke lwà ciinà cyà màyi aku, nènku kùvwa Muntu musòmbe mwaba awu Wàkamwambila bintu byònsò bìvwàye mwenzè, Nzambi mubanji mu luse Lwèndè.

<sup>141</sup> Nzambi umwèumwè awu, dilòlò edi, ùdi ànu mubanji ke mu luse Lwèndè, ne ànu byà mwomùmwè ne mùvwàYe mu matùkù awu amu. Nzambi mubanji. [Katùpà kàà mukàbà wa mèyi munda mutupù—Muf.]

<sup>142</sup> Ngèèla meeji tudi baabànye twartà twà disambila nkàmà yibìdi mwaba ewu, anyi tutùdi babiikile mu nkàmà yibìdi ayi. Netùbàbiikile ne kwelesha bantu milongo. Netùbàsambidile.

<sup>143</sup> Kàdi kumpàla kwà twètù kucyènza, bwà ne kwòkò kwikale mwab’ewu bantu bapyabàpyà, bwà kuya kule ne diitabuuja dyà majimbu dyònsò. Eci kî ndiitabuuja dyà majimbu to. Ndimwènèshiibwa dyà mulayi wà Nzambi. Mbilàadile ku cyùdi utàngila. Kakwèna bukolè nànsha bùmwe mu muntu kanà yònsò ewu to. Kakwèna bukolè mu muntu nànsha umwe to. Kàdi twètù bu beena kwitabuuja tudi ne bukòokeshi; kî mbukolè to, kàdi bukòokeshi.

<sup>144</sup> Muntu kampànda mmunkonkèshe, àbìdi adi paanshì aa, wàmba ne: “Mwanèètù Branham, udi wela meeji ne udi ne bukolè bwà kwenza cikampànda anyi?”

<sup>145</sup> Mémè ne: “Ncyèna ne bukolè to, nànsha kakesè, kàdi ndi ne bukòokeshi.” Mwenà kwitabuuja yònsò ùdi naabù. Wèwè mubùbenge, neùshàadilè ànu mwaba ùdi awu. Kàdi wèwè mubwítàbe, nebwènzè byàbùngì bitàmbe, bwalu Nzambi mmubanji mu luse Lwèndè.

<sup>146</sup> Twàngatààyibi mpùlushi mukesè mwimanè mu mùsèèsù mwàmwa, ne bilàmbà bilembèlèle bimushùikidila mu cifùka, mwikale munyànè yònsò. Ne kafulu kapwekesha ne ku maci. Kàdi ùpàtuka pambèlù pààpa pàdi màshinyi ènda àpweka ne mùsèèsù awu, mu lubilu lwà kilòmèètà makumi mwandamukùlù ku dîbà, myòteelà ya makànda tubalù nkàmà yisàtù munda amu. Wa bwalu kàyi mufobù wà kwimanyika dikalu dyètù edi to. Ncyà bushùwà. Kàdi àdìdingè èlabi kashibà aku ne èlè cyanza aci muulu, nènku numòne mùdi bitofù bìdila. Yèyè kèna ne bukolè to, kàdi ùdi ne bukòokeshi. Cimenga cijimà cidi paanyimà pèndè.

<sup>147</sup> Nènku pàdi mulùme anyi mukàjì, nànsha wèwè mu ngiikàdìlù kaayi, udi ne bukòokeshi bwà Nzambi, ku mulayi, bwalu Yèyè mmubanji ne mmulaye bwà kwenza byàbùngì bitàmbe. “Wèwè mwambile mukùnà ewu ne: ‘tentèmùkà,’ ne kùyì wela mpatà mu mwoyi wèbè to, kàdi witaabuuja ne ciwàmbi aci necyènzeke, udi mwà kupeta cyùdi mwambe aci.” Kwèna ne bukolè nànsha bùmwe to, kàdi udi ne bukòokeshi.

148 Vùlukàayi pàkangambilàYe kale wàwa, wàmba ne: “Neùkùmbane mwà kubuulula maalu masokoka à mu myoyi.” Bwalu Yèyè. . . Nudi bavùlùke aci, bààbùngì bàà ku nwènù beena mu Phoenix anyi? Yèyè ngwàkacìlaya. CìdiYe ùlaya aci, Yèyè ùdi wènza.

149 Mpindyewu kùdi bàmwè bàà kunùdi mwab’ewu bàdi kabàyi ne twartà twà disambila, ne kakùyì mpatà to. Mbanganyi bàdi bàsaama ne kabàyi ne twartà twà disambila, elàayi byanza muulu? Bushùwà. Èyo. Pawikalà muswè kumanya, kí mbukòòkeshi to. . . kí mbukolè to, kàdi bukòòkeshi bwà Dìyi, “Bintu bìNdì ngènza, nenùbyènzè pèènù.”

150 Yesù wàkalaya, mu Luukà 17:30, ne ànu kumpàlà kwà Dilwa Dyèndè, kùvwa mwà kwikala bu cikondo cyà Mòsà. . . anyi Noà, “Pàvwabo bàdya ne bànwà, ne bàsèleshangana; kàdi kabààkamanya bwalu to too ne ditùkù dyàkabwela Noà mu bwatù.” Wàkamba ne kùvwa mwà kwikala nàнку cikondo aci. Pashìishe Wàkamba kàbìdì ne: “Ànu mwàkadìbi mu matùkù à Lotà,” ne kwamba ne: “eci necyènzeke mu ditùkù adi piikalà Mwànà wa muntu mwà kubuuludiibwa, pàdi Mwànà wa muntu ùbuuludiibwa mu matùkù à ndekeelu.”

151 Mpindyewu tàngilàayi cìdiYe, mùvwà Mwànà wa muntu ùDibuulula mu mupersona wà Mwanjèlò ewu, uvwa Mwànà wa muntu awu. Kakùyì mpatà to. Abraham wàkaMubiikila ne: “Elohim.” Yèyè ùvwa Mwànà wa muntu, wàkaDibuulula ànu pabwipi ne bàà Bisàmbà byà bendè kwoshiibwabò. Wàkacyènzà bishi? Kùdi mwena kwitabuuja. Kùdi mwena kwitabuuja wa budingibudingi, Wàkatùma bayiishi bàbìdì bwà kubàyiisha. Kàdi bwà mwena kwitabuuja mulelèlè, Wàkiimana ne nyimà Wendè mukoma ku ntentà, ne kwambaYè ne: “Abraham.” Yèyè ùvwa Abram ditùkù. . . matùkù makesè kumpàlà kwà, cyòci aci’s. Kàdi mpindyewu ùdi Abraham. “Mukajèèbè Sarah, ùdi penyì?”

152 Yèyè ne: “Ùdi mu ntentà, paanyimà Pèèbè apu.”

153 Yèyè ne: “Néndamè mulayi Wànyi kùdi. Nènkumwènèkèlè.”

154 Kaa, Abraham ùvwa ne bidimu lukàmà, ne Sarah ùvwa ne bidimu makumi citèèmà; kàdi Nzambì, mubanji mu luse, wàkalama mulayi Wèndè. Cyàkatwàla mwànà awu, bwalu Nzambì ùdi ne luse be, ne Yèyè mmùle tètè ne luse. Yèyè mmubanji mu luse. Ùtu ùshàala mukwàte ku mulayi Wèndè.

155 Mònaayi ne, ne nyimà Wendè mukoma ku ntentà, Sarah kusekaye e kwamba ne: “Mmunyi mùdi bintu ebi mwà kwikala’s? Mèmè ewu mununu. Mmunyi mùndì mwà kupeta milòwu ne bayanyi, bu nsongààkàjì ucidibù bàsèlelakù? Mòna’s, yèyè ùdi ne bidimu lukàmà lwà kabamba. Bwena nzùbu bwètù bukaadi bujikè, kukaadi bidimu bùngì kabùyì kubala. Eci cidi mwà kwenzeka mùshindù kaayi?” Ki kusekaye bwà bwalu abu.

156 Nènkù Mwanjèlò ne. . . Mwânà wa muntu ne nyimà Wendè mukoma ku—ku ntentà, kwamba ne: “Bwà cinyi Sarah mmusekè, wàmba ne: ‘Mmunyi mùdì bintu ebi mwà kwenzeka?’”

157 Cìvwa ncinyi? Yesù wàkamba, mu Luukà Munsantu 17:30, ne: “Mu matùkù bu mwàkadìbi mu matùkù à Lotà,” maalu àmwèàmwè awu, kumpàla kwà bàà Bisàmbà byà bendè kwoshiibwabo, Yèyè wàkamba ne: “Mwânà wa muntu neàDibuulule mu ditùkù adi.” Wàkenza mulayi ne, Maalàki 4 mmutùlayè ne cìvwa mwà kwamba nànkù. Mukenji kampànda uvwa mwà kulwa ùvwa mwà kwalujulula bantu ku Mukenji wà mpenta wà ku cibangidilu awu, ne mabènesha àmwèàmwè àkadibo naawù mu ditùkù dyà. . . Ncinyi aci? Mmukanku wà mapwàpwà àbìdì, byònsò Dipungila Dikùlukulu ne Dipyadìpyà, àtuuta milayi yèndè cyàpàmwè, yà Nzambì, bwà kùja cìdì milayi yà Bible myambe ne neyenzè. Amen.

158 Nzambì, mubanji mu luse, kì mmufwànyine kulekela cisàmbà Cyèndè cipàtuka mu cyena-màngumba eci to ne: “mubanji ne bintu byà ku byanza ne bintu byà pa buloba,” Cíkondo cyà Èkéleeziyà wa Laòdikiyà, kàdi Yèyè ùvwa mwà kuseba njila wa dipàndukila. Cìtàbùùjaayi, nwènù bantu. Nzambì ànùbènèshè. Amen. Nzambì mubanji mu luse! Luse luvulè lwà Nzambì, kì cintu cimwèpelè cìndì njinga ncyòci aci. Kì mbwakàne Bwèndè to, kì mikenji Yèndè to; kàdi luse Lwèndè ke lùndì nkèba. Nzambì àtufwèku luse. Twètù bwònsò tudi ne njija ayi.

159 Mvwa munkaci mwà kutàngila. Kùdi mukàji mutekète musòmbe kaaba aka lwà mu ndekeelu mwà nkwasa mwàmwa. Udi ne karta kàà disambila kuntwaku anyi, inábànzà? Kwèna naakù to. Lekèlaayi nnùleejè ne Nzambì mmubanji mu luse. Uvwa bulelèlè ne mijilu mibìndùlùke mwab’ewu, kì mmwòmò anyi? Bibì be, ne mèsù èbè mmanyanguke. Kì mmwòmò anyi? Ncyà bushùwà. Mpindyewu neashintulukè. Nzambì, mubanji mu luse Lwèndè, bwà kukonka ní udikù mwà kwitabuuja cyòci eci. Mpindyewu kwèna ne kartà kàà disambila to, kwèna ne cintu nànsha cimwè to; kàdi kwèna naaci dìjinga to. Nwamònu’s, ngàsà ngudi mukwenzela.

160 Muntu mukesè bikolè be nyèyè wàwa musòmbe ànu kuntwaku mumpàla emu, mwikale bu ne. . . musòmbe ànu mwab’ewu. Udi ùsaama cyùjà mu mubidi wèndè. Ncipatùke ànu àbìdì adi paanshì aa, àbìdì aa. Kì ncyà bushùwà anyi, mukalenge? Ncyà bushùwà. Kwèna mumanyè ne ncinyi to. Cìdì cìkwenza bwòwà. Ncyà bushùwà. Cìvwa cyenzèkele ku cijùji, kì mmwòmò anyi? Udi ne karta kàà disambila anyi? Kwèna ne kartà kàà disambila to. Kwèna naakù dìjinga to. Nzambì mubanji mu luse Lwèndè!

161 Kaa, mwanèètù wa balùme, mwanèètù wa bakàji, itàbùùja Nzambì! KuMwèdì mpatà nànsha. Mwitàbùùje! Ncyà bushùwà.

162 Muntu nyewu musòmbè apa, muvwàle nkoozi wa lusengàsengà, ne bìnètè kwísù. Tàngilà kunweku, mukalenge. Udi witabuuja anyi? Nzambì mmubanji mu luse Lwèndè. Wèwè udi musòmbè mwaba awu ne kààmunda. Udi witabuuja ne Nzambì ùdi mwà kwondopa kààmunda aku ne kukusàngaja anyi? Musòmbè ànu lwà mwab'ewu lwà ku ndekeelu kwà nkwasà, muntàngile. Wèwè mwiitabùùje ne Nzambì ùdi mwà kwondopa kààmunda aku, Nzambì neàkusàngàje bu wèwè mwà kuciitaba. Udi uciitabuuja anyi? Udikù mwà kuciitaba anyi? Èyo. Udi mwà kucípeta bu wèwè ànu mwà kuciitabuuja, kupeta luse. Èyowà's, mukalenge.

163 Inàbànzà nyèyè ewu musòmbè mwab'ewu, ùdi ùsaama mu mubidi wèndè ne bukèèpèlè bwà lwendu lwà mashi ne màyi. Kàdi bu yèyè mwà kwitabuuja, Nzambì neàmwondòpè, yèyè muciiitabùùje. Ngèela meeji ne neàcipangile, mmwòmò menemene. Ikàlàku ne luse, ke disambila dyànyì. Bìvwa bikolè bwà kumòna dyà mukàji awu. . . Mandamu Riley, udi witabuuja ne Nzambì ùdi mwà kwondopa bukèèpèlè bwà lwendu lwà mashi ne màyi abu anyi? Wèwè mwà kwitabuuja, cyàkidile! Amen. Itàbùùjà ànu cyanààna. Nzambì mmwìmpè, kí mmwòmò anyi, Stella? Èyowa. Ncyà bushùwà. Kacya bandela nciitukù mwanji kumòna mukàji awu to. Kàdi, Nzambì, mu luse Lwèndè!

164 Mukàji mukwàbò nyèyè ewu musòmbè, musòmbèle ànu lwà paanyimà pàapa, ànu lwà paanyimà mene, munkaci mwà kuntàngila buludi. Yèyè, kàbìdi, ùdi ne bukèèpèlè bwà lwendu lwà mashi ne màyi, pèndè. Úvwa munkaci mwà kwelapù meeji díbà adi. Nciitukù mwanji kumòna mukàji ewu ne mùndì emu to. Bu mùdibi ne mukàji mukwàbò ewu ùvwa ne cintu cimwècimwè aci, ntàngilè. Udi witabuuja ne mèmè ndi mupròfetà wa Nzambì, anyi musadidi Wèndè anyi? Udi kàbìdi ne disaamà dyà mwoyi. Pìikalà aci ncyà bushùwà, elà cyanza muulu. Kwèna naadi mpindyewu to. Nzambì, mubanji mu luse Lwèndè, ùdi ùleeja ne Yèyè ùdi ne mwoyi mu nzùbu emu dilòlòlò edi. Nzambì mubanji mu luse Lwèndè! Amen.

165 Kùdikù mwà kwikala, mbangènzàmpèkààtù búngì munyi ne batwè cimpingà bàdi mwà kjuukila kuulu, ne kwamba ne: “Nzambì, mubanji mu luse Lwèndè, ikàlàku naanyì luse”? Juukilaayi kuulu. Nènnùsambidilè, nwènù nwiitabuuja ne Yèyè mmuswè. . . udi muswè luse mpindyewu. Nzambì àkubènèshè. Nzambì àkubènèshè. Nzambì àkubènèshè, wèwè. Mutwè cimpingà, imànyina kuulu. Nzambì mubanji mu luse Lwèndè! Udi—udi. . .

166 Ncyà bushùwà ne kanwèna banèmè bujitu bikolè, mu ngiikàdilù awu to, mu mùshindù wà kanùyì mwà kumòna ne aci ke mulayi mene wà cikondo. Ncyà bushùwà ne kanwèna batàmbe kudjìngila mu dingumba, ne bikwàbò bintu to, bwà kupanga mwà kumòna ne eci ke mulayi wà díbà, Nzambì mubanji mu luse.

167 Nànsha wèwè nganyì, uvwa mwimane kuulu, ndi ne cyà kusambila ànu mu katanci kakesè nàka. Ndi muswè bwà wèwè kudisebela njila mutàngìle ku èkèleeziyà kampànda mwîmpè wa Èvànjeeliyò mu kaabujimà ne—ne kwikala—ne kubàtijiibwa mu dibàtiiza dyà bwena Kilistò, Nzambi ùkupèèsha Nyumà Mwîmpè.

168 Kùdikù mukwàbò wa ùjuukila kuulu, ne wàmba ne: “Mémè, ndi muswè bwà bamvùlùke. Nzambi, mu luse Lwèbè, wamvùlukakù. Ncyèna ne nsòmbelu ùmvwà ne cyà kwikala nendè to. Pàmwăpa . . .”? Nzambi àkubènèshè, inăbànzà. Nènku Nzambi àkubènèshè. Nzambi àkubènèshè. Nzambi àkubènèshè. Nzambi àkubènèshè. Ncyà bushùwà. “Nzambi, mubanji mu luse Lwèndè, ikàlàku naanyi luse.” Nzambi àkubènèshè, mwanèètù wa bakàji. Kùdikù . . .?

169 Mbanganyì bakwàbò bàdi kaaba aka, bàmba ne: “Nèngìmanè. Ndi muswè bwà Nzambi àmanyè ne ndi muswè luse. Ncyèna mwende lwendu lwîmpè nànsha. Ndi mwende lwendu lwà mùshindù *kampànda* ne mùshindù *kansanga*. Ndi mumòne mabika ne mala, kàdi ndi dijinga ne luse Lwèndè.” Nzambi àkubènèshè, mwanèètù wa balùme. Muntu mukwàbò, wàmba ne: “Nzambi mubanji mu luse Lwèndè!” Nzambi àkubènèshè, mwanèètù wa bakàji. Nzambi àkubènèshè, mwanèètù wa bakàji. Ncyà bushùwà. Nzambi mmubanji mu luse Lwèndè! Nzambi àkubènèshè, wèwè pèèbè. Nzambi àkubènèshè lwà paanyimà apu. Nzambi mmukumòne. Juukilà ànu kuulu cyaanàanà.

170 Udi wamba ne: “Bìdi byàmbulwisha ku cinyì, Mwanèètù Branham?” Bushùwà. Juukilà kuulu kàdi ùmòne mùshindù ùdibi bishiilàngàne.

171 Wèwè ne meeji matòoke malelèlè mu mwoyi wèbè, Nzambi mmubanji mu luse. “Yèyè kènà ùjinga bwà ní nganyì kubùtukayè nànsha, kàdi bwà bwònsò bàfikè ku kanyinganyinga.” Nzambi mubanji mu luse Lwèndè! Èyi Nzambi, ikàlàku neetù luse.

172 Mpindyewu mbanganyì mwab'ewu mpindyewu, bàcidi balame twartà twà disambila? Tùvwa cinyì? Twà A ne twà B, kí mmwòmò anyi? Twà A ne twà B. Bantu bwònsò bàdi ne kartà kàà disambila kàà A, imànyinaayi *elu* luseke, ne kartà kàà disambila kàà B nebiimanyine lwà paanyimà pààbò.

173 Ndi ndikonka ní kùdi bàmwè bambi mwaba ewu bàdi bafwànyine kulwa bwà kungambulwisha. Bwòbò biikàlekù, bàsweku bwà kubànda, nèngìkale ne disànkà dyà kwikala ne dyambulwisha dyènù—dyènù kaaba aka, bwalu netwikalè ne disànkà dyà kusambila, ne kusambila—kusambila neenù.

174 Eci, Bible mmwambè ne: “Bimanyinu ebi nebìfilè aba bàdi biitabuujà.” Èyowà's, mukalenge. “Mu Dìna Dyànyì bwòbò nebiipatè baadémons, nebààkulè mu myakulu mipyamìpyà.”

Tukàadi bacyènzè anyi? Ku ngàsà wa Nzambi; kî ntwètù to, kàdi Nzambi mubanji mu luse bwà kulama Dìyi Dyèndè. Nzambi!

<sup>175</sup> Mpindyewu, tùkalù twà balèma, nwénù mwà kubàtèekela ànu mwaba ewu lwà kumpàlà eku; netùbàsambidile ànu kaaba aka, kabyàkukèngela bwà kubàpulumuna too ne kwàka, mu luseke lwònsò lwàlwa to. Enzàku, èyo, bàlwe buludì kùneeku. Ncyà bushùwà ne netùsambilè, yònsò wa kutùdì. Nzambi mubanji mu luse Lwèndè!

<sup>176</sup> Udikù mwà kwimanyina ku luseke lwà dyàbalùme mpindyewu, bwà tusunsa tukesè anyi? Mwanèètù Brown mmulwè neebè anyi? [Mwanèètù wa balùme kampàndà ùdi wàmba ne: “Ùlwalwa mààlabà.”—Muf.] Ùlwalwa mààlabà. Mvwa—mvwa—mvwa mu ditèkemena ne yéyè neikale mwaba ewu. Mpenyi, Mwanèètù Outlaw ùdi penyi, Mwanèètù Fuller ùdi penyi? Bàmwè bàà ku bantu bàvwà naanyi mwaba ewu pangàakalwa dyàmbedi abu, twàlùkilàayi. Nudi bavùlùke milongo yà babèèdì yà cyena-kale eyi, patùvwà ne ciibidilu cyà kwimana mwaba awu too ne munùvwà mwà kunkwàta ku luseke lùmwe, ne mukwàbò muntu ku luseke lukwàbò, mùmvwa mucyòka bikolè anyi?

<sup>177</sup> Mbanganyi bàvwà bàsanganyiibwa mu masangisha kale wàwa ku cibangidilu? Tàngilàayi kunweku. Nudi nuvùluka kale wàwa, ngaakanwàmbila ne Mukalenge Yesù mmungambile ne, bu mèmè mwà kwikala ne meeji matòoke, ne bintu ebi bivwa mwà kwenzeka. Ncyà bushùwà anyi? Kacya katùvwakù banji kwikala ne cyà bwena aci mu ditùkù adi to. Kàdi ncyenzèke, bwalu Nzambi mmubanjike mu luse Lwèndè, ne lulamatu ku mulayi Wèndè. Amen! Ndi nteeta kulekela, kàdi nciyi mwà kulekela to. Amen! Nzambi àtumbè! Àlèluuyàh! “Kaa, ndi ne disànkà dyàbùngì be mùndì umwe wabò!” Amen. Kaa, ekèlekèle!

Kùdi bantu pàmwe ne myaba yònsò,  
 Beena myoyi yìdì yònsò yìlakuka  
 Ne Kapyà kàakapòna dyà Mpenta,  
 Kàakabàkezulà ne kubàvwija bakezùke aku;  
 Kaa, Kàdi kàlakuka mpindyewu munda mwà  
 mwoyi wànyì,  
 Kaa, butùmbì kùdì Dìna Dyèndè!  
 Ndi ne disànkà dyàbùngì dyà kwamba ne ndi  
 umwe wabò.

<sup>178</sup> Kaa, mèmè, mukèngeledi wa luse, mukèngi, mpofò mukwate ne luse mukèngeledi, mùmvwa amu; nènku mpindyewu ku luse Lwèndè, luse Lwèndè lubanjike, ndi mwà kumòna Bukalenge bwà Nzambi ne mèsù. Amen. Mùshindù mene ùdi Méyi Èndè matùma malenga kumòna's wè!

<sup>179</sup> Imànyìnà ànu mwaba awu, mwanèètù wanyì wa balùme, ne dyèbè dyà balèma adi. Pawikalà kùyì mwà kwimana kuulu to,

mbîmpè, shààla ànu kaaba aka, netùpweke bwà kukusambidila.

<sup>180</sup> Nènku mpindyewu beena twartà twà disambila twà A ne twà B abu, bàlwe, bèèlèlè mulongo lwà ku luseke lukwàbò kwàka, nènku netùbàsambidile.

<sup>181</sup> Bambi naanyì, nudi bushùwà, panwikalà nwitabuujà ditentekela dyà babèèdi byanza, lwàyì kunweku ne nwimane naanyì pa cibumba cyà ku cyambilu eku. Netùsambidile babèèdi.

<sup>182</sup> Mpindyewu bwènù nwènù bàdi biimàne mu mulongo awu abu, bu nwènù mwà kwitabuujà ne Bwikadi bwà Nzambì bùdi kaaba aka, ne Nyumà Mwîmpè ùdi munkaci mwètù mpindyewu, wènza ànu menemene cyàkambàYe ne Neénzè aci. Bu ne mvwa ne bukolè bwà kukwondopa, ncyà bushùwà ne mvwa mufwànyine kucyènza. Bu ne mvwaku ne mùshindù wà kukwondopa, ncyà bushùwà ne mvwa mufwànyine kucyènza. Ncyènà naawù to. Ndi . . . Nzambì mmufile kaadipà kakesè.

<sup>183</sup> Ncyènà nànsha muyiishi wa nsongo to. Ncyènà mulonge kàlaasà kakùmbàne bwà kubiikidiibwa ne muyiishi to, cidìbo bàbiikila ne mmuyiishi mu matùkù aa aci, pàdibi—pàdibi ne malabula adi ne cyà kwikala dilabula dyà tèòlòjì, ne dìdi ne cyà kwikala ne dipolome kampànda dyà bu doctorat, ne bikwàbò. Ncyènà mwà kukùmbanyina aci to. Kàdi Nzambì, udi mumòne mwoyi wànyì, ne mmumanyè ne ndi muswè kuMwenzelaku cintu kampànda, ndi muswè kucyànyisha.

<sup>184</sup> Muntu kampànda kungambilayè ditùkù adi, wàmba ne: “Ndi ngèèla meeji ne wèwè udi ànu muntu wa maalu malenga, Mukalenge Branham, kàdi ndi ngiitabuujà ne udi mu ntùpàkànyì ne meeji matòke wònsò. Wèwè yònsò udi pambèlù pàà diswa Dyèndè. Udi mumanyè ne neùpiishiihwè ku ndekeelu anyi?”

<sup>185</sup> Ki mèmè ne: “Tàngilà kuneeku, ndi muswè kukwambila cintu kampànda. Ndi ngànji kwamba ne wèwè—ne wèwè udi mubinga, ànu bwà kwamba bwà kutùngunuka ne muyiiki. Piikalàbi ne ndi mu ntùpàkànyì, cìndì nciyi ngiitabuujà ne ki mùndi to; kàdi bu ne mvwa mu ntùpàkànyì, ne mumanyè mpindyewu mene ne nêngiikalè ne mwoyi munda mwà bidimu lukàmà, ne Yèyè ùvwa ne cyà kumpiisha ku ndekeelu kwà njila, ne ùngambila ne: ‘Kwèna mukùmbànyine bwà kubwela mu Dyulu Dyànyì to, William Branham. Pàtuka nda mu mîdimà yà pambèlù yàya.’ Nudi bamanyè mùdi bwalu anyi? Mvwa mufwànyine kuMukwàcila mudimu ditùkù dyònsò dyà mwoyi wànyì too ne pangààyà, nànsha bishi. Bwalu ndi mupete mabènesha Èndè àbùngì àndi nciyi mukùmbànyine to, mu mùshindù wà ne Yèyè mmutàmbe ne mwoyi bwànyì mèmè. Yèyè ke cyònsò cìndì . . .”

<sup>186</sup> Cyònsò cìndì aci, cyònsò cìmvwàku mwà kutèkemena kwikala aci, ndi mubìpetèle ku ngàsà Wendè ne luse. Mvwa mukèngeledi wa luse, mwena dikènga, mupèlè, mpofò; kàdi ku



ngàsà Yèyè wàkangondapa, ne mèmè ndi ne makàndà ne mubidi tumatuma, ku ngàsà wa Nzambi. Ndi ne lumònù lwimpè. Ndi ne cyàkudyà, cyàkunwà, mwikale ne cyònsò cìndi naaci dijinga aci. Yèyè kàtukù mulaye bwà kukùmbaja majinga ànyì to; ànu makèngela àànyì.

<sup>187</sup> Nènku mèmè mwipàcìibwe ku ditùkù adi, ne mumanye. . . Ncyèná mwà kumòna mungùikale mufwànyìne kwipaciibwa to. Kàdi bu ne mvwa mumanyè ne mvwa mutùpàkàne, ne Nzambi munsungùle bwà kwikala mutùpàkàne, ndi mufwànyìne kujinga bwà kushààla mutùpàkàne, nènku ng' ànu bwalu ndi muswe kwenza diswa Dyèndè. Bìdi ne, ndi muMunange mu mùshindù wà ne ndi muswè bwà diswa Dyèndè dyènjiibwè. Mpindyewu, aci's ndìyi dinène, kàdi ndi ntékemena ne nudi bacyòmuvwè mu mùshindù, ne mu nyumà ùndi mucyàmbilè awu. Nwamònu's, ndi muswè kwenza diswa Dyèndè. Ntu mmulòmba cintu kampànda mîngà misangu, Ùkùpa mutù Wèndè wàmba ne “to,” ndi ànu nsànka bikolè bwà bwalu abu ne mwànyì mwònsò mûndi mwà kusànka bu Yèyè mwambe ne “èyo.” Bwalu, tudi ne cyà kulòmba misangu yònsò ne: “Diswa Dyèbè dyènzekè.” Yèndè to yìdi ànu bu. . . cyòci ciikàle diswa Dyèndè, bìdi ànu. . . Yìdi yònsò mîmpè bikolè bitámbe èyo Yèndè, byòbi biikale diswa Dyèndè bwà kucyènza. Apu's mpaùdi muMunange bulelèlè. Amen.

<sup>188</sup> Pàntù nditwa mu dyakula bwà bwalu Bwèndè, ncìtu ànu mwà kwimanyika to. Kaa, Yèyè's mmulelèlè be, mulelèlè bikolè bwànyì's! Balundà bàànyì, Yèyè's—Yèyè's ke cyònsò cìndi ngùikalangana, cyònsò cìmvwàku mwà kwikala, cyònsò cìndi ntekemena bwà kwikala aci, ncyelèle miji mu Kilistò Yesù, mu Dìyì Dyèndè.

<sup>189</sup> Ndi ne kusàkidila dilòlò edi bwà bujaadiki bwà Nyumà Mwimpè, bwà Mukenji. Ndi mumanyè ne mbifwànyìne, bàmwè mbafwànyìne kupanga kupetangana naaWù, kàdi ànu bu munkàadi munwambile, ndi muswikùibwe ku Mukenji kampànda. Cimanyinu cyàkapàtukà, ne Nzambi kàyàakutùma cimanyinu ànu bwà kuleeja ne Yèyè ùdi Nzambi nànsha. Mukenji, Dìyì ditu misangu yònsò ànu dilonda cimanyinu. Muntu kanà yònsò ewu mmumanyè aci.

<sup>190</sup> Yesù wàkalwa ne bimanyinu ne maalu à kukèma. Yèyè ùvwa Muntu munène pàvwàYe wènza bimanyinu ne maalu à kukèma, kàdi pààkabangàYe kusòmbela panshì bwà kubanga kutwàla Mukenji ne: “Mèmè ne Taatù Wanyì tudi Umwe,” kaa, ekèlekèle, aci's cìvwa cyà mafi kùdìbo. Nwamònu anyi? Kàdi bìvwa bìkèngela bwà Dìyì kulondadi cimanyinu aci.

<sup>191</sup> Bààkapèèsha Mòsà bimanyinu bibìdi, ne cimanyinu cyònsò cìvwa ne dìyì. Ncyà bushùwà. Mvwa muyiishepù kukaadi cikondo kampànda, mwaba kampànda, pa ne: *Dìyì Dyà Cimanyinu*. Cidi ne cyà kwikala ne—ne Dìyì dyà cimanyinu. Cidi

dishintuluka. Bitu misangu yônsò ànu mùshindù awu. Byôbì kabiyi nànkù to, díbà adi kacívwa cifùmine kùdi Nzambì to.

<sup>192</sup> Muntu yéyè mupàtuke ne mudimu wà bwambi wà pabwàwù kawùyi wà ciibidilu, kawùyi ùsanganyibwa mu Bible ne m'Bulelèlà, kàdi muntu awu ùshààla ànu mu dilongesha dimwèdimwè dyà kale dyà cyena dīgumba adi, aci cipwayi mwoyi. Kacyèna ne bwà nsongo to! Nzambì kàtu wènza cintu bu nànkù to. Aci cintu, aci's mmana mabolè àdì ne binya munda mwàwù amu, anyi misàndà, anyi mwônsò munùdì baswè kucibìikila amu, à kukaadi bidimu makumi ànaayi, anyi makumi àtaanu, bacitùngùntuke ànu ne kuteeta bwà kudyà mana à kale àkamatà kale wàwa bidimu kabiyi kubala. Ne bânà bàà Izalèlèlà, mu lwendu lwàbò, mana mapyamàpyà àvwa àmata butùku bwônsò. Ncyà bushùwà, kanùvwakù mwà kuàlama ne pààcyàbo to.

<sup>193</sup> Katwèna ne mwoyi ku cikondo kampànda cikwàbò cimanè kupita nànsha. Tudi munkaci mwà kudyà Manà mapyamàpyà, Manà mapyamàpyà àfùmina mu Dyulu, mu lwendu lwètù patùdì twenda tuya apu.

Twìnyikàayi mitù yètù mpindyewu.

<sup>194</sup> Mukalenge Nzambì, Wèwè udi mulelèlà menemene, Bwikadi Bwèbè. Ngèèla meeji ku ngàsà, Mukalenge. Tudi—tudi ànu baKumòne wènza bintu búngì cyanàànà! Tudi baKúmuvwè wakula mu myakulu, baKumòne uyàndamuna, ku bantu Bèèbè aba. Èyi Nzambì, bwà kuKumòna uyàndamuna babèèdì, utàbaja mèsù à mpofo, wendesha balèmà, ufikisha mpudimaci ku dyumvwa, tumàmà ku dyakula, Udi Nzambì munène ne wa bukolè kaayi's wè!

<sup>195</sup> Ne pashìshe pa kumòna ne Wèwè ngwàkalaya cyòci eci mu matùkù à ndekeelu. Nànsha mutùdì ne ditentula dyà musunya dipite búngì emu, kàdi bìdi bìleeja patòòke ne kùdi Nzambì mulelèlà, mwaba kampànda, udi bushùwà menemene mulelèlà. Nènku ndi ndòmba, Taatù wa mu Dyulu, dilòòlò edi, bwà twìkalakù bamanyina menemene mu kondo kàà mwoyi diikalangana dyà Nzambì bwà twàmòna ne Udi kaaba aka.

<sup>196</sup> Ne bantu bàdi mu mulongo aba, pààpìtabo mu mulongo ewu, Mukalenge. . . bwalu tudi twenza nùnkù bwalu, bwà ne twakabènzela mulayi. Ne Wèwè wàkamba ne: “Bimanyinu ebi nebifilè aba bàdi bìitabuujà.”

<sup>197</sup> Ki bambi naanyi aba biimàne kaaba aka, bantu baùdì Wèwè musungùle, kumpàlà kwà difùkà dyà dyulu ne buloba, bwà kwikala cìdìbo dilòòlò edi. Wèwè uvwa mumanyè, kumpàlà kwà kwikalaku buloba, ne netwìkalè mwà kwimana kaaba aka dilòòlò edi, bwalu Wèwè kwèna ne mikàlu to.

<sup>198</sup> Pa nànkù tudi tulòmba, Taatù wa mu Dyulu, dilòòlò edi, bwà bantu bàdi bàsaama aba, bacibùkile panshi, bafofo, balèmà, bafyekela kùdi kànsère, ní ncinyi cyònsò cidì cifwànyine

kwikalakù aci, bàdi bàpicila mu mulongo ewu, swákù bwà bajingulule ne Nzambì mene udi mumanyè maalu masokoka à mu mwoyi awu neàbondòpe, bwòbò ànu mwà kuciitaba cyanààna, kutàngila cyanààna ne kuumvwa.

<sup>199</sup> Muntu wàkatàngila nyòka wa cyamù cyà mitakù awu ànu bu mwakwidi. . . bu katùpà kàà cyamù cyà mitakù, kàvwakù mufwànyine kwondopiibwa to, bwalu kavwa ne luumvu lwà ne civwa cinyi to.

<sup>200</sup> Nènku leelù ewu, Mukalenge, mbyà mwomùmwe. Bwòbò beyèmene dipà, bwà kwelakù meeji ne ndifwànyine kukumbana mwà kubakwacisha, kabèena ne luumvu to. Bwalu bùdi ku dishindikiiibwa dyà Bwikadi bwà Nzambì udi kaaba aka bwà kwondopa awu. Enzàku nànkù, Taatù. Swákù bwà byènzeke, mu Dìna dyà Yesù. Amen.

<sup>201</sup> Ndi muswè bwà mwimbi mukesè wa pyàno awu, yèyè mwà kuswa, mùlume anyi mukàji, nànsha yèyè mwikàle nganyi, bwà àpiteku kuntu kwàka bwà kwimba musambu ewu ne: “Ngàngàbukà munène ùdi pabwìpì mpindyewu, mwabanyanganyi wa luse Yesù,” bu yààya awu mwà kuswa, mwaba wònsò ùdi mwimbi wa pyàno ùsanganyiibwa awu. Mpindyewu aci’s. . .

<sup>202</sup> Ndi mvùluka òmwè dyà ku masangisha àànyì à dyondopa, ku Fort Wayne, mu Indiana. Nsongàakàji mutekète wa ba-Amish musòmbè, wimba pyàno ne: “Ngàngàbukà munène ùdi pabwìpì mpindyewu, mwabanyanganyi wa luse Yesù.” Bàvwa bantwàdile mwànà mukesè wa mu mabòko pa cibùmà cyà ku cyambilu apu, ùvwa mucibùkile paanshi. Nènku pàmvwà munkaci mwà kusambidila mwànà wa mu mabòko awu, wàkatùmpika mu mabòko àànyì ne kutùuluka lubilu ku cibùmà cyà ku cyambilu aku. Mamwèndè kuuminyinayè. Kakwèndè mukàji kukùpa mushàle wèndè muulu, kubanga kudila.

<sup>203</sup> Nènku mwànà mukesè wa bakàji wa ba-Amish ewu mpindyewu, kàyì mumanyè cintu nànsha cimwè pa bìdi bitàngilà beena Mpenta to, bwalu ùvwa wa mu èkèleeziyà wa ba-Amish; kàdi ùvwa munkaci mwà kwimba cisanji. Nsukì yèndè mile mipwèke ne panshi; wàkabiika mu Nyumà ne kubanga kwimba mu myakulu myenyi, nènku. . . nènku ne cyonà cyà musambu awu. Kàdi mbòtè yà pyàno kubangayì yibànda yipweka, yimba ne: “Ngàngàbukà munène ùdi pabwìpì mpindyewu, mwabanyanganyi wa luse Yesù.” Amen! Yèyè udi umwèumwè awu makèèlèlè, leelù, too ne kashidi.

<sup>204</sup> Mpindyewu túsambilàayi mpindyewu bu. . . Mpindyewu muntu yònsò udi usanganyiibwa muntwamu àsambile. Nwènù bàdi bàpicila mu mulongo, patùdì tunùtentekela byanza apu, nwàvùlukaayi ne, Yesù wàkamba ne: “Bu wèwè mwà kuciitabuuja, udi mufwànyine kusàngala.” Udi uciitabuuja anyi? Mpindyewu twimbàayi bwònsò mpindyewu.

Ngàngàbukà munène udi pabwîpi mpindyewu,  
 Yesu mwabanyanganyi wa luse;  
 Ûdi wàkula . . .

Tubwitàayi ànu mèsù ètù mpindyewu patùdi twimba apu.

. . . ùkolesha myoyi,  
 Kaa, tèèlejà Dìyì dyà Yesù.

Cyona cishême mu musambu wà bàsalafimà,  
 Dìnà dishême pa ludimì lwà muntu wa  
 cifwàkà,  
 Lutàmbe kusheema . . . (Taatu Nzambi, enda  
 pa bantu mpindyewu) . . . mwimba,  
 Éyì Yesù, Yesù mubènèshìibwe.

Munène . . .

<sup>205</sup> Mpindyewu paùdi upìcila mpindyewu apa, Yêyè ùdi kaaba aka. Angàtà dîyì dyànyì, anyì udi ucìitabuuja wêwè mwinè, Yêyè ùdi kaaba aka. Bantu bwònsò dítwayi mu disambila mu batèeleji amu mpindyewu bwà bantu. [Mwanèètù Branham ùdi ùsambidila babèèdi, Mwanèètù Borders ùdi ùtùngunuka ne kwimba *Ngàngàbukà Munène*. Katùpà kàà mukàbà wa mèyì munda mutupù—Muf.]

Éyì Mukalenge, ndi ngiitabuuja, Éyì  
 Mukalenge, ndi ngiitabuuja;  
 Bintu byònsò bìdi mwà kwenzeka, Éyì  
 Mukalenge, ndi ngiitabuuja.

<sup>206</sup> Bwònsò bàdi bìitabuuja, elàayi cyanza muulu mùshindù ewu, nwamba ne: “Ndi ngiitabuuja.” [Disangisha didi dyàmba ne: “Ndi ngiitabuuja.”—Muf.]

<sup>207</sup> Muntu mulùme nyèwù musòmbe mwaba ewu. Cìmvwà muleepèshile maalu; ngàakula, yèyè ùdi ùpùnga ne lufù ne kànsèrè. Ûdi ne dibaya dya balèma edi. Kakwènakù mùshindù nànsha ùmwè pa buloba apa bwà muntu ewu kwikalayè ne mwoyi to, pakuumusha Nzambi. Ûdi ne kànsèrè mu mala mwònsò, ne neáfwe kabùyi bwà luse lwà Nzambi nànsha. Nènkù ndi njinga bwà ngìkalakù mwà . . . [Katùpà kàà mukàbà wa mèyì munda mutupù—Muf.] . . . mwakù wà dikolesha naawù muntu ewu ku mwoyi.

<sup>208</sup> Wêwè, udi mumanyè ne bangàngàbukà kabèèna mwà kukwenzela cintu nànsha cìmwè bwà mpindyewu nànsha. Udi dyàmwàmwà dyà dyambulwisha dyàbò, wamònu’s. Ne wêwè udi . . . Wêwè udi ne mpùngà ànu umwèpelè, ne ùdi mu Kilistò, wamònu’s. Nènkù, mwanèètù, wêwè . . . Mèmè nèmfwè dīngà ditùkù, mèmè pàànyì. Nebikèngele bwà wêwè kuya, bu Yesù mwà kunènga. Nebikèngele bwà mèmè kutuutakeena neebè kuntu kwàka, kwimana kuntwaku ku Tubàdi twà Cilumbulwidi. Nènkù dilòlòlò edi . . .

209 Nudi bamanyè's, bu ku tèlèviziyô, tèlèviziyô mmujandulè ne musangu wônsò utùdi nànsha tunyungisha munu wètù, cintu kanà cyônsò, cìdi cìkwàciibwa. Mwàkù wônsò utùdi twamba, mmukwàciibwe. Mpindyewu, nwamònu's, tèlèviziyô mmujaadike cyôci aci. Mpindyewu, tèlèviziyô kàtu wenza bimfwànyi nànsha, ùdi ànu òlola njila udi divwala adi dikabwelela mu tèlèviziyô. Nwamònu's, yêyè kàtu ùbyènza to. Kùvwa ntèlèviziyô pàvwà Adàmà wèndakana pa buloba, kùvwa ntèlèviziyô pàvwà—pàvwà Mòsà ùpicila mu Mbù Mukünze, kùvwa ntèlèviziyô pàvwà Eliyà pa Mukùnà wa Kaamèlè, nwamònu's, kàdi bàdi bàfùma kudimujandula mpindyewu. Nwamònu anyi? Nènku mpindyewu myaba yônsò yîndi . . .

210 Dinyungakana dyônsò ditùdi twenza, ne cyona cyônsò, cìdi munkaci mwà dikwàciibwa pa mukàbà wàtwilangane neetù ku Cilumbulwidi. Dinyungakana dyônsò ditùdi twenza nediiikale ne cyà kutwilangana neetù kuntwaku. Nebikèngele bwà mèmè kulumbulula bwà méyì àndi nzwàmbila, bu mwambi. Nebikèngele bwà mèmè kwenza nànkù, bwalu Nzambi neàmbadile bujitu bwaci.

211 Mpindyewu bu mèmè ne mùshindù, s'mvwa mwà kukusàngaja; bwalu udi ànu ne cikondo cikesè, bu kabùyì bwà Nzambi. Mpindyewu, ndi mutùùlùke bwà kukusambidila, ki cyônsò cimvwà mumanyè mwà kwenza. Mwanèètù, cintu kanà cyônsò pa buloba apa, cìndi mufwànyine kwenza bwà muntu udi musòmbe mwaba awu mu ngiikàdìlù awu, ndi mufwànyine kucyènza.

212 Kàdi lekèla nkwebèjeku, wamònu's. Wèwè—wèwè—wèwè ukàadi mwondàpiibwe, bwalu Yesù mmwàmbe ne uvwa mwondàpiibwe. Nwamònu's: "Ku mibùndàbùndà Yèndè twàkondopiibwa." Mpindyewu bu wèwè mwà kufùdisha, ànu munda mwà mwoyi wèbè, kwitaba aci, kwàkufwà mpindyewu to, kàdi newikale ne mwoyi.

213 Mpindyewu, nwamònu's, mpindyewu tudi bamanyè ne tèlèviziyô ùdi munkaci mwà kupicila mu cibambalu eci. Tudi bamanyè aci. Katwèna tumumòna to. Katwèna mwà kumumòna to, mèsù etu kì mmenjiibwe, byumvwilu byètù kabyèna mwà kubikwàta to. Bìdi bìkèngela kalòndò kàa mulungu kenza, anyi ní ncinyi aci, lumwènu, bwà kucibàkula.

214 Ke mùdi Nzambi mwab'ewu. Twètù katwèna tuMumòna to, kàdi tudi bamanyè ne Yèyè ùdi kaaba aka. Yesù Kilistò ùdi umweumwe awu. Tàngilàayi, Yèyè's wàfumu ku didimanyisha's, mushindu mwine ùdiYe ùDyènzà's. Mpindyewu, bwà pa bìdi bitàngila lwondopu, bu ne Úvwa mwimàne mwab'ewu mene mpindyewu, Kàvwa mwà kukwènzela cikwàbò cintu to, nwamònu's, nànsha cimwè. Bu ne Mwànà wa Nzambi ùvwa mwimàne ànu mwaba ewu, ki mùdiYe mene, Yèyè ùdi kaaba aka, kàdi Yèyè kàvwa mwa kukwènzela cikwàbò cintu to, bwalu

Yèyè ukaadi mumane kuDimanyisha kaaba aka. Nwamònu anyi? Ne Yèyè ùdi kaaba aka mpindyewu mene, ànu umwèumwè awu, bwà kukwondopa ne kukusàngaja.

215 Kàdi inábànzà mukesè wàwa kungambilayè kuntwaku, wàmba ne: “Uvwa mulòmbe dibènesha, ne mufille dīyī dyà cipròfetà anyī cintu kampànda,” bwà bwalu bwèndè, bwà wàmòna mwà kupeta mwànà wa mu mabòko, musòmbe mu kàkalù kàà balèmà. Ke cyàkenzàye, yèyè kupeta mwanèndè awu.

216 Nènku mpindyewu inábànzà mutekète musòmbe mwab’ewu. Mpindyewu yèyè mmupicìle ku dipandiibwa dyà cibòdibodi, ne kumucibwilaci paanshì. Èè, tudi ànu tumòna bintu abi byàbúngì byènzeka. Mpindyewu, mwanèètù wa bakàjì, mukesè awu, ndi mumanyè ne wèwè udi mwena Kilistò mushùwashùwàlè. Bwà cinyi Nzambì mmukulekèle musòmbe mwaba awu, mèmè ncyèna mumanyè to. Ngèèla meeji ne, pàmwàpa, mbwalu udi ne. . . Diitabuujà, udi—udi uteeta bwà kwikala ne diitabuujà, bwà kupàtukamù, nwamònu’s; kàdi mpindyewu tàngilà, katùteeci ànu kudìpeta to, twikalààyi ànu naadi mpindyewu, nwamònu’s, netwikale ànu—netwikale ànu mwà kufikakù. Ki cyònsò cidìku aci, necìbangishè ànu mpindyewu mene, nènku netùsangalè. Ne nwènù bàdì mu nkwasà abu, cinyi, anyi—anyi cyònsò cinùdì aci, vùlukààyi ànu ne Kilistò ùdi kaaba aka.

217 Mpindyewu wèwè udi wamba ne: “Kùdikù muntu kampànda, udi umòna fòtò wanyi udi munkaci mwà kupicilamù awu anyi?” Kaa, èyowà’s.

218 Nànsha mene Mèyi à Yesù Kilistò, àkaakulàYe pàvwàYe pànu pa buloba awu, àdi ànu munkaci mwà kupitakana mu cibambalu emu. Kaàtu àfwa to. Mbanganyi bàdì bamanyè ne aci mbulelèlè bilondèshìle maalù à mamanya? Èè, ncinyi ciine aci? Dìbà adi Nyumà udi ùbàkula Dīyī didì difùndiibwe adi, ne uDimwènesha. Kaa, butùmbi’s wè!


219 Yèyè ùdi kaaba aka. Ùdi kaaba aka mpindyewu mene, Mukalenge awu. Tudi ànu. . . Tukàadi bamòne bipite búngì, Yèyè ùkaadi mwenze bipite búngì, mu mùshindù wà ne tudi benze ànu bu, nudi bamanyè’s, ànu bu batòndòke bacitupike. Bu twètù mwà kujingulula, kaciyi ànu cintu kampànda cyà cikwàtakaja, mwàkù kampànda wa cyena tèòlòjì to; kàdi cileeeji cyà ne Yèyè wàkalaya ne Ùvwa mwà kuDileeja mu ditùkù edi, s’ki Yèyè ewu munkaci mwà kucyàkula patòòke mwab’ewu mene kumpàla kwètù mpindyewu mene. Cintu cilenga kaayipu’s wè! Aci kí ncilenga anyi?

220 Mpindyewu udi witabuujà. Neùcìtábùjè anyi? Kwitabuujà ne kwàkufwà to. Newikale ne mwoyi, ne neùpeeshè Nzambì luumù. Neùpeeshè Nzambì luumù. Ukààdikù mubàtìjìibwe anyi? Wèwè udi mwena Kilistò, mmwòmò anyi? Ne udi mwena Kilistò. Èè, udi muswè kwikala ne mwoyi bwà luumù lwà Nzambì.

Pashiishe ndàaku wìkale ne mwoyi, mwanèètù wa balùme. Mu Dìna dyà Yesù Kilistò, ikàlà ne mwoyi!

<sup>221</sup> Nènku, mwanèètù wa bakàji, udi muswè kwenda bwà butùmbi bwà Nzambi, ne kutàngila bwalu bwà mwanèèbè wa mu dibòko; pashiishe endàku, mwanèètù wa bakàji, mu Dìna dyà Yesù Kilistò!

<sup>222</sup> Nwênù, yònsò wa kunùdì, enzàayi cintu cìmwècìmwè aci, mu Dìna dyà Yesù Kilistò! Kanùpù mwoyi Cilaala-benyi cinène cyà Westaward Ho eci dilòòlò edi mwab'ewu to, Bwikadi bwà Nzambi bumanyishìibwe kaaba aka. Yèyè kàtu ùsunguluja muntu to. Yèyè mmuswè ànu bwà wèwè kwitabuuja. Nudi nuMwitabuuja mpindyewu anyi? Amen. Nzambi ànùbènèshè.

<sup>223</sup> Twìnyikàayi mitù yètù mpindyewu. Ncyèna mumanyè ne mbasungùle nganyi to, bwà—bwà kutùtangalaja. Mwanèètù Mushegian ewu, lwilà kunweku, mwanèètù. Neatùtangalàje mu disambila. Nzambi àkubènèshè. 

65-0119 Nzambi Udi Mubanji Mu Luse  
Westward Ho Hotel  
Phoenix, Arizona États-Unis

CILUBA

©2024 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)



## Dîyî dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwê anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilsto. Mukanda ewu kawenaku mwa kusumbishiibwa, kuvudijjiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)